

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI SELASA : 5 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' DR. NOOR AZMI BIN GHAZALI
[BAGAN SERAI]
TARIKH : 05 NOVEMBER 2019 (SELASA)

SOALAN NO. 1

Y.B. DATO' DR. NOOR AZMI BIN GHAZALI [BAGAN SERAI] minta **MENTERI KEWANGAN** menyatakan mengapakah rokok seludup dan vape masih berleluasa sedangkan Kementerian sedar kerugian berbilion-bilion setiap tahun kerana gagal dalam kutipan cukai ini .

JAWAPAN

Tuan Yang Dipertua,

Untuk makluman Yang Berhormat, Kerajaan sentiasa memandang serius berhubung isu penyeludupan rokok tidak sah yang semakin berleluasa di pasaran memandangkan kegiatan penyeludupan rokok ini telah menyebabkan ketirisan hasil duti dan cukai yang tinggi kepada Kerajaan. Oleh yang demikian, usaha menangani aktiviti penyeludupan rokok sentiasa giat dilaksanakan Kerajaan, sebagai contoh, Jabatan Kastam Diraja Malaysia (JKDM) sentiasa meningkatkan aktiviti penguatkuasaan dan melaksanakan operasi berterusan seperti Operasi Outlet Rokok yang telah diadakan sejak tahun 2010, bertujuan untuk menyekat penyeludupan dan penjualan rokok di outlet dan premis yang menjual rokok tidak sah. Selain itu, Operasi Ops Pacak turut dilaksanakan bertujuan untuk membanteras pengedaran rokok tidak sah dan mengawal rantai bekalan rokok seludup di tempat-tempat yang dikenali sebagai *hot spot*.

Selain itu, penubuhan pasukan *task force* khas dengan kerjasama agensi-agensi penguatkuasaan lain seperti Polis Diraja Malaysia, Suruhanjaya Pencegahan Rasuah Malaysia, Jabatan Imigresen dan Jabatan Laut turut dilaksanakan bagi mengawal pintu keluar dan masuk utama sempadan Malaysia termasuklah pemantauan rapi melalui mesin pengimbas, melakukan aktiviti rondaan darat, rondaan laut, pemeriksaan rapi kenderaan, premis dan outlet terutamanya yang disyaki menyimpan barangan belum lulus kastam.

Dalam usaha membanteras penyeludupan rokok seludup ini juga pihak JKDM telah membuat pindaan ke atas Akta Kastam 1967 dan Akta Eksais 1976. Pindaan penalti yang lebih berat iaitu penalti minimum RM100 ribu atau minimum 6 bulan penjara akan dikenakan ke atas kes penyeludupan rokok yang berkuatkuasa pada 2 Januari 2019. Semua kes berkaitan penyeludupan akan didakwa dan tiada lagi kompaun yang dibenarkan bagi sebarang kes yang melibatkan rokok. Di samping itu juga, bagi pesalah yang dijatuhi hukuman boleh diperintahkan oleh mahkamah untuk menjelaskan nilai duti/ cukai yang

terlibat kepada Ketua Pengarah Kastam.

Kerajaan juga sedang mengkaji langkah untuk menyertai *Protocol to Eliminate Illicit Trade in Tobacco Products* di bawah *WHO Framework Convention On Tobacco Control*, di mana kajian secara menyeluruh meliputi tahap kesediaan, mekanisme dan garis panduan pelaksanaan sedang diperhalusi termasuklah mengenalpasti fungsi dan peranan semua agensi yang terlibat bagi melihat persediaan Malaysia untuk menyertai Protokol berkenaan. Ini jelas menunjukkan komitmen dan keseriusan Kerajaan dalam menangani penyeludupan produk tidak sah.

Berhubung penggunaan *vape* yang dilihat semakin berleluasa di pasaran, adalah dimaklumkan bahawa Kementerian Perdagangan Dalam Negeri dan Hal Ehwal Pengguna telah mengeluarkan garis panduan berhubung aktiviti pengeluaran, pengedaran dan peruncitan peranti serta cecair rokok elektronik tanpa nikotin. Walaubagaimanapun, Kementerian Kewangan difahamkan bagi penjualan cecair yang mengandungi nikotin adalah dikawal selia oleh Kementerian Kesihatan Malaysia di bawah Akta Racun 1952 dan Akta Jualan Dadah 1952 di mana penjualannya hanya dibenarkan oleh ahli farmasi berlesen dan pengamal perubatan berdaftar untuk tujuan rawatan perubatan. Selain itu, Kementerian Kesihatan Malaysia juga sedang menggubal Rang Undang-Undang Kawalan Tembakau bagi mengawal semua produk rokok dan tembakau termasuk rokok elektronik, *vape* dan *shisha*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MOHD SHAHAR BIN ABDULLAH
[PAYA BESAR]**

TARIKH : 5 NOVEMBER 2019 (SELASA)

SOALAN

Minta **MENTERI PEMBANGUNAN USAHAWAN** menyatakan
menyatakan :

- (a) senarai bantuan kewangan dan jumlah yang telah diberikan oleh Kementerian kepada usahawan dan syarikat Bumiputera sejak Mei 2018 sehingga kini; dan
- (b) prestasi terkini dana RM1 bilion untuk usahawan muda yang disalurkan melalui Dana Pemerkasaan dan Keusahawanan Anak Muda

JAWAPAN

Tuan Yang di-Pertua,

(a) Kementerian Pembangunan Usahawan telah menyalurkan bantuan kewangan kepada usahawan dan syarikat Bumiputera melalui program-program melalui agensi-agensi di bawahnya sebagaimana berikut:

(i) TEKUN Nasional (TEKUN)

TEKUN telah menyalurkan sebanyak **RM457.8 juta** kepada **36,034 usahawan Bumiputera** melalui program-program seperti berikut:

- (a) TEKUN Niaga
- (b) TEMAN TEKUN
- (c) TEMANNita
- (d) Kontrak – i

(ii) Suruhanjaya Koperasi Malaysia (SKM)

SKM menyediakan bantuan kewangan kepada **132 koperasi** yang terlibat dalam pelbagai sektor ekonomi, dengan nilai keseluruhan **melebihi RM 6 juta** sejak Mei 2018 sehingga kini.

(iii) SME Corporation (SME Corp)

Antara program yang telah dilaksanakan oleh SME Corp, yang mensasarkan komuniti usahawan Bumiputera adalah seperti berikut:

- (a) **Program Tunas Usahawan Belia Bumiputera (TUBE)** – program bagi membantu meningkatkan daya saing PKS Bumiputera ini bersifat inklusif dan mengambil kira golongan berpendapatan 40 peratus terendah (B40) di bandar dan luar bandar. Sokongan

kewangan melalui **geran bernilai RM15,000** ada ditawarkan melalui program ini. Sejak Mei 2018, **sejumlah 1,963 belia Bumiputera** telah menerima latihan dan menjalankan perniagaan serta berjaya mewujudkan sejumlah **3,870 peluang pekerjaan**.

(b) **Program Peningkatan Perusahaan Bumiputera (BEEP)** - program ini bertujuan untuk meningkatkan daya saing PKS Bumiputera menerusi bantuan bersepadu yang meliputi khidmat nasihat, bantuan teknikal, latihan dan sokongan kewangan dalam bentuk geran bersamaan. Sejak Mei 2018, sejumlah **65 syarikat PKS Bumiputera** telah diluluskan **geran bersamaan berjumlah RM2.1 juta**.

(c) **Program Galakan Eksport Bumiputera (GEB)** - program ini bertujuan untuk mewujudkan rantai perniagaan dalam kalangan PKS Bumiputera, serta membantu mereka menerokai potensi Komuniti Ekonomi ASEAN (AEC) dan menambah bilangan PKS Bumiputera yang menembusi pasaran antarabangsa. Bantuan kewangan bersepadu ditawarkan dalam bentuk geran bersamaan disediakan oleh SME Corp. dan pinjaman mudah daripada MARA. Sejak Mei 2018, sejumlah **25 syarikat Bumiputera** telah diluluskan **geran bersamaan berjumlah RM2,725,116.21**.

(iv) **SME BANK**

SME Bank aktif melaksanakan mandat sebagai sebuah Institusi Kewangan Pembangunan (IKP) bagi membantu pengembangan PKS negara. Bagi tempoh Mei 2018 sehingga Julai 2019, SME Bank telah merekodkan kelulusan pembiayaan sekitar **RM2.28 bilion** kepada **752 usahawan** dengan peratusan berjumlah **62% syarikat Bumiputera dan 38 % bukan bumiputera**.

Tuan Yang di-Pertua,

(b) Untuk makluman Yang Berhormat, pelaksanaan program bagi memperkasakan keusahawan anak muda adalah dilaksanakan menggunakan peruntukan sedia ada Kementerian–kementerian yang terlibat.

Secara asasnya, sebanyak lapan (8) Kementerian yang terlibat dalam melaksanakan program pembangunan keusahawanan Anak Muda iaitu:

- (i) Kementerian Pembangunan Usahawan;
- (ii) Kementerian Belia dan Sukan;
- (iii) Kementerian Tenaga, Sains, Teknologi, Alam Sekitar dan Perubahan Iklim;
- (iv) Kementerian Komunikasi dan Multimedia;
- (v) Kementerian Pembangunan Wanita, Keluarga dan Masyarakat;
- (vi) Kementerian Hal Ehwal Ekonomi;
- (vii) Kementerian Pertanian dan Industri Asas Tani; serta
- (viii) Kementerian Pembangunan Luar Bandar.

Justeru, Kementerian Pembangunan Usahawan (MED) telah memperkenalkan Dasar Keusahawanan Negara (DKN) pada 11 Julai 2019 dalam usaha untuk mewujudkan ekosistem keusahawanan yang holistik, kondusif dan inklusif bagi semua lapisan usahawan.

Antara program/inisiatif baharu yang sedang dilaksanakan oleh MED untuk membantu usahawan-usahawan di Malaysia terutama sekali usahawan muda adalah seperti berikut:

- (i) **Program Pembangunan Usahawan Fertigasi (Fertigreneur)**
- (ii) **Program baharu di bawah Professional Training and Education for Growing Entrepreneurs (PROTÉGÉ)**

NO. SOALAN : 2

MED telah menetapkan sasaran untuk melatih 15,000 graduan setahun dalam bidang keusahawanan seperti :

- (a) PROTÉGÉ *Ready to Work*
 - (b) PROTÉGÉ *Booster*
 - (c) PROTÉGÉ *Uni-Preneur*
 - (d) PROTÉGÉ *Business Accelerator*
 - (e) PROTÉGÉ *Reach Out*
- (iii) **Program Tunas Usahawan Belia Bumiputera (TUBE) 6.0** oleh SME Corp.
- (iv) **Program Tunas Usahawan Baitulmal** oleh SME Corp.
- (v) **Kit Panduan bagi Perniagaan Permulaan** oleh SME Corp.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan beberapa EOT telah dikeluarkan oleh KPKT di bawah pentadbiran BN dan pentadbiran PH, rasional untuk mengeluarkan setiap EOT, nama pamaju dan dan nama projek perumahan yang mendapat kelonggaran ini.

JAWAPAN

Tuan Yang di-Pertua,

1. Untuk makluman Yang Berhormat, *Extension of Time* (EOT) diberikan kepada pemaju berdasarkan pertimbangan perkara-perkara berikut:

- a. Terdapat kekangan atau arahan daripada Pihak Berkuasa Tempatan berkenaan penetapan had waktu masa bekerja di tapak;
- b. Terdapat arahan untuk mematuhi keperluan infra seperti *Integrated Water Supply Scheme* (IWSS);
- c. Ketinggian bangunan melebihi 30 tingkat;
- d. Mempunyai pembinaan podium/*basement*;
- e. Keadaan muka bumi yang memerlukan kerja tambahan untuk memastikan kekukuhan struktur bangunan;
- f. Terdapat pemajuan bersepadu dan berfasa di mana sesuatu pembangunan perlu disiapkan kerja-kerja infra terlebih dahulu sebelum pembangunan fasa lain boleh diteruskan;
- g. Mengambil kira kedudukan lokasi dan projek sekitar yang dilaksanakan; atau
- h. Isu sentimen kawasan seperti sekolah yang mempunyai kekangan masa dan jenis kerja.

2. Berikut adalah statistik kelulusan EOT dari tahun 2017 hingga 2019:

Tahun Perkara	2017	2018	2019 (sehingga Julai 2019)
Jumlah Permohonan	137	119	61
Permohonan Diluluskan	93	93	46
Permohonan Ditolak	44	26	15

3. Secara dasarnya, EOT hanya dipertimbangkan bagi projek yang belum mempunyai pembeli. Pembeli mempunyai hak untuk membuat keputusan membeli pemajuan yang mempunyai tempoh pembinaan yang panjang/lama.

4. Berdasarkan Peraturan 11(3) Akta Pemajuan Perumahan (Kawalan dan Perlesenan) 1966 (Akta 118) & Peraturan-Peraturan menyatakan bahawa:

Jika Pengawal berpuas hati bahawa oleh kerana hal keadaan yang khas atau kesusahan atau keperluan mana-mana peruntukan dalam kontrak jualan tidak boleh atau tidak perlu dipatuhi, ia boleh, dengan perakuan bertulis, mengetepikan atau mengubahsuaikan peruntukan berkenaan:

Dengan syarat bahawa tiada pengecualian atau ubah suaian sedemikian boleh diluluskan sekiranya permohonan baginya dibuat selepas tamat tempoh masa penyerahan pemilikan kosong di bawah kontrak jualan atau selepas tempoh sah apa-apa lanjutan masa jika ada, yang diberikan oleh Pengawal

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN ARTHUR JOSEPH KURUP
[PENSIANGAN]

TARIKH : 5 NOVEMBER 2019

SOALAN

TUAN ARTHUR JOSEPH KURUP [PENSIANGAN] minta **MENTERI LUAR NEGERI** menyatakan apakah statistik warganegara Malaysia yang telah menjadi pelarian di negara asing.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Pensiangan atas pertanyaan yang dikemukakan.

2. Kerajaan mengalu-alukan keprihatinan daripada pelbagai pihak berhubung isu warganegara Malaysia yang menjadi pelarian di negara asing. Untuk makluman Dewan yang mulia ini, isu pelarian atau permohonan suaka merupakan isu yang kompleks dan melibatkan undang-undang negara asing serta konvensyen antarabangsa. Ini termasuklah proses penentuan status pelarian yang berada di bawah tanggungjawab Pesuruhjaya Tinggi Pertubuhan Bangsa-bangsa Bersatu bagi Pelarian (UNHCR) dan Konvensyen mengenai Status Pelarian 1951 serta Protokol Status Pelarian 1967. Atas sebab keselamatan dan privasi, kerajaan asing tidak akan mendedahkan identiti, latar belakang dan statistik permohonan suaka yang diterima.

3. Kerajaan juga sedar bahawa terdapat rakyat Malaysia yang mengambil kesempatan dengan memanipulasi undang-undang imigresen tempatan bagi membolehkan mereka menetap di negara asing dengan tempoh yang lebih lama. Keadaan ini telah mengakibatkan kesukaran kepada rakyat Malaysia lain yang berhasrat untuk melancong, belajar, bekerja atau menetap di negara-negara asing secara sah.

4. Justeru, Kerajaan sentiasa menasihatkan rakyat Malaysia supaya sentiasa mematuhi peraturan dan undang-undang tempatan. Mereka juga diingatkan supaya tidak menyalahgunakan kemudahan imigresen yang diberikan oleh Kerajaan Malaysia dan negara asing bagi mengelakkan kesukaran yang boleh ditimbulkan kepada rakyat Malaysia yang lain. Ia juga penting demi menjaga nama baik negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 5 NOVEMBER 2019 (ISNIN)

SOALAN

TUAN JUGAH ANAK MUYANG @ TAMBAT [LUBOK ANTU] minta **MENTERI KOMUNIKASI DAN MULTIMEDIA** menyatakan adakah Kementerian akan menaik taraf dan menambah jaringan internet melalui kabel fiber optik yang ada sekarang ini memandangkan jaringan yang ada sekarang agak lemah serta tidak menyeluruh bagi kegunaan masyarakat serta jabatan-jabatan Kerajaan yang sedia ada.

JAWAPAN

Tuan Yang di-Pertua,

1. Untuk makluman Ahli Yang Berhormat, penambahbaikan perkhidmatan jalur lebar boleh dilaksanakan melalui pelbagai teknologi dan tidak terhad kepada rangkaian gentian optik sahaja. Berkaitan dengan perkara ini, pihak Kerajaan telah melancarkan Pelan Gentian Optik dan Kesalinghubungan Negara (atau National Fiberisation and Connectivity Plan, ("NFCP")) bagi menyediakan kesalinghubungan digital yang mampan, menyeluruh, berkualiti tinggi dan mampu milik untuk seluruh negara.
2. Sasaran-sasaran yang telah ditetapkan mengambilkira keperluan untuk meningkatkan kualiti dan liputan perkhidmatan jalur lebar. Tumpuan-tumpuan utama NFCP adalah kawasan-kawasan yang kurang liputan di seluruh negara termasuklah di negeri Sabah dan Sarawak. Penyediaan perkhidmatan jalur lebar di bawah NFCP akan dimantapkan lagi dengan pembinaan infrastruktur komunikasi baharu yang lebih menyeluruh di seluruh negara.
3. Di negeri Sarawak, sepanjang 1,237 km *fiber* telah siap beroperasi dan digunakan untuk penyediaan perkhidmatan 4G. Pihak Kerajaan juga melaksanakan projek Sistem Kabel Dasar Laut yang menghubungkan Semenanjung ke Sabah dan Sarawak yang bertujuan untuk meningkatkan kelajuan internet dengan pemasangan rangkaian kabel gentian optik dasar laut berkapasiti 4 tarabit sesaat dengan jumlah jarak keseluruhan melebihi dari 3,800 kilometer.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN AHMAD AMZAD BIN
MOHAMED@HASHIM
[KUALA TERENGGANU]
TARIKH : 05 NOVEMBER 2019 (SELASA)

SOALAN NO. 6

Y.B. TUAN AHMAD AMZAD BIN MOHAMED@HASHIM [KUALA TERENGGANU] minta **MENTERI KEWANGAN** menyatakan tujuan penerbitan Bon Samurai kali kedua dilakukan seperti yang diumumkan oleh YAB Perdana Menteri di Jepun pada bulan September 2019.

JAWAPAN

Tuan Yang di-Pertua,

1. Keperluan pembiayaan Kerajaan Persekutuan diperoleh menerusi penerbitan bon dan sukuk Kerajaan daripada sumber dalam negeri dan juga luar negeri. Seajar dengan peraturan kewangan yang telah ditetapkan seperti yang termaktub di dalam Akta Pinjaman (Tempatan) 1959, Akta Pendanaan Kerajaan 1983 dan Akta Pinjaman Luar Negeri 1963, pinjaman hanya dibuat untuk membiayai perbelanjaan pembangunan dan membiayai semula hutang yang matang.

2. YAB Perdana Menteri telah mengadakan lawatan kerja ke Jepun dari 6 hingga 8 September 2019. Antara perkara yang diumumkan semasa lawatan tersebut adalah cadangan menerbitkan bon Samurai siri kedua. Perkara ini turut diumumkan semasa pembentangan Belanjawan 2020 pada 11 Oktober 2019 di mana Kerajaan Jepun melalui Japan Bank for International Cooperation (JBIC) sekali lagi menawarkan untuk menjamin bon Samurai siri kedua dengan kadar faedah lebih rendah yang kurang daripada 0.5%. Terimaan daripada terbitan ini akan digunakan untuk membiayai perbelanjaan pembangunan merangkumi program dan projek pembangunan termasuk sekolah, hospital, jalan dan menyediakan akses kepada utiliti.

Tuan Yang di-Pertua,

3. Akta Pinjaman Luar Negeri 1963 juga menetapkan bahawa siling pinjaman luar negeri tidak melebihi RM35 bilion. Sehingga hujung tahun 2019, jumlah hutang luar negeri terkumpul adalah RM29.9 bilion atau 3.7% daripada jumlah hutang Kerajaan Persekutuan. Di samping itu, penerbitan bon Samurai siri kedua juga tertakluk kepada keadaan pasaran kewangan global semasa dengan mengambil kira kos pembiayaan serta kadar tukaran mata wang asing bagi memastikan kos pinjaman adalah kompetitif dan tidak membebankan Kerajaan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 5 NOVEMBER 2019 (SELASA)

SOALAN NO. 7

TUAN SIVAKUMAR VARATHARAJU NAIDU [BATU GAJAH] minta **MENTERI KESIHATAN** menyatakan bilangan pesakit buah pinggang yang terpaksa menjalani rawatan dialisis di seluruh negara. Berapa ramai di antara mereka menerima rawatan dialisis di hospital-hospital Kerajaan dan jumlah pesakit yang masih dalam senarai menunggu.

JAWAPAN

Tuan Yang di-Pertua,

Prevalens pesakit yang mengalami kegagalan buah pinggang meningkat dengan drastik. Akibatnya jumlah pesakit buah pinggang yang memerlukan rawatan dialisis semakin meningkat. National Health Morbidity Survey 2011 mendapati prevalens pesakit Chronic Kidney Disease (CKD) adalah sebanyak 9.07% dan meningkat kepada 15.5% pada tahun 2018. Punca utama pesakit buah pinggang adalah penyakit diabetes mellitus (61 %), darah tinggi (18%) punca yang tidak diketahui (15%), glomerulonephritis (3%), obstructive nephropathy (1%) dan lain-lain (2%).

Untuk makluman Yang Berhormat, Data *Preliminary* dari *National Renal Registry* 2018 menunjukkan terdapat seramai:

SOALAN NO : 7

- a) 42,189 orang pesakit buah pinggang yang sedang menjalani rawatan dialisis di seluruh Negara; dan
- b) Daripada jumlah itu, seramai 11,416 orang pesakit pesakit buah pinggang yang menjalani rawatan dialisis di hospital-hospital kerajaan, manakala baki 30,773 di pusat dialisis swasta atau NGO.

Jumlah pesakit buah pinggang yang masih dalam senarai menunggu bagi penempatan pusat rawatan adalah sama di pusat dialisis Kerajaan, swasta atau NGO iaitu sebanyak 3,007 orang. Buat masa ini, pesakit-pesakit ini sedang menjalani rawatan sementara di pusat dialisis Kerajaan, swasta atau NGO sehingga penempatan di pusat rawatan tetap dikenal pasti.

Manakala di Batu Gajah pula, pada tahun 2019, Hospital Batu Gajah telah menerima peruntukan untuk menaik taraf bagi menambah dua (2) Point Reverse Osmosis (RO) yang menempatkan dua (2) buah mesin yang dapat menambahkan 12 slot tambahan kepada pesakit.

Ketika ini, Hospital Batu Gajah menyediakan sebanyak 11 buah mesin dialisis bagi kemudahan rakyat setempat dan menerima seramai 40 orang dan jumlah pesakit menunggu adalah seramai 57 orang (33 orang membayar sendiri & 24 di bawah tajaan Baitulmal/SOCSO/JPA). Di Batu Gajah juga, terdapat dua (2) Pusat Hemodialisis Swasta/NGO.

Sekian terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROBERT LAWSON CHUAT [BETONG]

TARIKH : 5 NOVEMBER 2019 (SELASA)

SOALAN

Minta **MENTERI PEMBANGUNAN LUAR BANDAR** menyatakan jumlah peruntukan yang telah disalurkan oleh Kerajaan untuk Sarawak bagi Projek Lampu Jalan Kampung pada tahun 2019 dan butiran agihan projek tersebut mengikut Bahagian di Sarawak.

JAWAPAN

Tuan Yang di-Pertua,

Untuk makluman Yang Berhormat, bagi tahun 2019, pelaksanaan Program Pemasangan Lampu Jalan Kampung (LJK) Negeri Sarawak telah memasuki fasa yang ketujuh (ke-7). Sebanyak RM9.13 juta akan diperuntukkan oleh Kementerian bagi pemasangan 4,500 unit LJK, dengan pecahan 1,500 unit LJK jenis *high pressure sodium vapour* (HPSV) dan 3,000 unit LJK jenis *light emitting diode* (LED), untuk diagihkan bagi pemasangan di 30 buah Parlimen luar dan pinggir bandar di seluruh Sarawak. Pecahan agihan LJK adalah mengikut Parlimen dengan agihan sebanyak 50 unit HPSV dan 100 unit LED bagi setiap Parlimen yang berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan statistik tindakan penguatkuasaan yang telah diambil terhadap Pendatang Tanpa Izin (PATI) yang berniaga tanpa kebenaran di negara kita dalam tempoh Januari 2017 sehingga hari ini. Apakah langkah-langkah pemantauan yang diambil untuk memastikan bahawa PATI ini tidak bermasyarakat menjadi peniaga haram yang mendatangkan keresahan terhadap warga tempatan.

JAWAPAN

Tuan Yang di-Pertua,

1. Untuk makluman Yang Berhormat, berdasarkan statistik Jabatan Imigresen Malaysia (JIM), Kementerian Dalam Negeri (KDN), sebanyak 43,612 operasi penguatkuasaan terhadap warga asing yang berniaga tanpa kebenaran di negara ini telah dijalankan bagi tempoh Januari 2017 hingga 31 Ogos 2019. Hasil operasi tersebut, tangkapan seramai 132,654 orang pendatang asing tanpa izin (PATI) dan 3,666 orang majikan telah dilakukan.
2. Manakala bagi operasi penguatkuasaan di pasar-pasar borong, sebanyak 139 operasi telah dijalankan oleh JIM bagi tempoh 1 Januari 2019 hingga 26 September 2019. Melalui operasi tersebut, sejumlah 375 orang PATI dan 54 orang majikan telah ditangkap atas pelbagai kesalahan imigresen.
3. Selain itu, Pihak Berkuasa Tempatan (PBT) juga telah mengambil tindakan penguatkuasaan bersepadu bersama agensi lain seperti Polis Diraja Malaysia (PDRM) dan JIM terhadap warga asing. Sehingga kini, 599 operasi penguatkuasaan PBT dan 492 operasi penguatkuasaan bersepadu melibatkan pelbagai agensi lain ke atas warga asing telah dijalankan.
4. Bagi memantau kegiatan perniagaan oleh warga asing, Jemaah Menteri pada 29 Mac 2019 telah bersetuju agar satu jawatankuasa khas ditubuhkan dengan dianggotai oleh Kementerian Dalam Negeri (KDN), Kementerian Perumahan dan Kerajaan Tempatan (KPKT), Kementerian Pertanian dan Industri Asas Tani (MOA), Kementerian Perdagangan Dalam Negeri dan Hal Ehwal Pengguna (KPDNHEP) dan Kementerian Wilayah Persekutuan (KWP). Jawatankuasa ini berperanan dalam meningkatkan keselamatan dan menangani banjiriran warga asing yang mendominasi beberapa pasar borong utama di Lembah Klang.

5. Selain itu, KPKT juga telah mengeluarkan surat kepada semua PBT pada 7 Ogos 2019 supaya meningkatkan operasi penguatkuasaan bersepadu bersama agensi-agensi Kerajaan yang berkaitan seperti PDRM dan JIM bagi tujuan mengekang aktiviti perniagaan di pasar borong yang dimonopoli oleh warga asing.

6. Untuk makluman Yang Berhormat juga, sebagai langkah kawalan, warga asing tidak dibenarkan menjalankan perniagaan kecil seperti mengusahakan kedai runcit atau lain-lain perniagaan menggunakan lesen milik penduduk tempatan. KPKT telah mengeluarkan Pekeliling Pengeluaran Permit Perniagaan Kecil Oleh Pihak Berkuasa Tempatan pada 30 Jun 2008. Pekeliling ini menyatakan aspek kawalan dan penguatkuasaan yang perlu dipatuhi oleh perniagaan kecil adalah:

- (i) Pengeluaran permit perniagaan kecil hanya dikeluarkan kepada warganegara Malaysia sahaja;
- (ii) Pemilik permit hendaklah berada di tempat berniaga sepanjang masa;
- (iii) Tindakan pembatalan permit boleh diambil ke atas pemilik yang memindah permit perniagaan mereka kepada warga asing; dan
- (iv) PBT boleh menyita serta merampas barang jualan serta merta tanpa perlu mengenakan amaran terlebih dahulu bagi perniagaan tanpa lesen.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH SOALAN : 5 NOVEMBER 2019 (SELASA)

SOALAN

Minta **MENTERI PEMBANGUNAN USAHAWAN** menyatakan mekanisme yang digunakan pada ketika ini oleh Kementerian dalam menggalakkan keusahawanan dalam kalangan belia dan generasi muda.

JAWAPAN

Tuan Yang Dipertua,

1. Untuk makluman Yang Berhormat, antara mekanisme yang sedang dilaksanakan oleh MED untuk menggalakkan keusahawanan dalam kalangan belia dan generasi muda adalah seperti berikut:

- (i) memberi pendedahan keusahawanan dan koperasi kepada pelajar sekolah melalui **program NURI Teenpreneurship 2019 oleh Bank Rakyat dan Program Young Entrepreneur Strive For Success (YESS) oleh Suruhanjaya Koperasi Malaysia (SKM)**;
- (ii) mengadakan **kerjasama dengan institusi pengajian tinggi (IPT) dan pemain industri melalui Professional Training and Education for Growing Entrepreneurs (PROTEGE)** bagi melatih "*entrepreneurial thinking*" di kalangan pelajar IPT.

Sehingga kini, sebanyak 649 syarikat/pemain industri telah mengambil bahagian dalam program ini;

- (iii) mengadakan “***pitching session***” melalui program **University Start-Up Challenge 2019** oleh **MaGIC** bagi membentuk minda keusahawanan dan melahirkan usahawan *start-up* di kalangan pelajar IPT;
- (iv) mewujudkan **Program Pembangunan Usahawan Fertigasi (Fertigreneur)** bagi meningkatkan bilangan usahawan dalam usaha penanaman secara fertigasi;
- (v) merasionalisasi dan memperkukuhkan **Program Tunas Usahawan Belia Bumiputera (TUBE) 6.0** oleh **SME Corp.**; dan
- (vi) melatih dan memperkasa usahawan belia melalui **kursus-kursus keusahawanan jangka pendek yang berasaskan *outcome based*, program berbentuk *mentoring/coaching* serta program yang menawarkan “*hands-on experience*” bagi usahawan belia yang ingin menceburi perniagaan berasaskan “*food truck*”** oleh INSKEN.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN JONATHAN YASIN [RANAU]

TARIKH : 5 NOVEMBER 2019 (SELASA)

SOALAN NO. 11

Minta **MENTERI PEMBANGUNAN LUAR BANDAR** menyatakan berapakah jumlah peruntukan pembangunan infrastruktur luar bandar yang telah diluluskan oleh pihak Kementerian kepada daerah Ranau pada tahun 2018 dan berikan perincian tersebut.

JAWAPAN

Tuan Yang di-Pertua,

Kementerian Pembangunan Luar Bandar sentiasa memberikan tumpuan terhadap penyediaan infrastruktur asas untuk masyarakat luar bandar di Sabah termasuklah di daerah Ranau.

Pada tahun 2018, sebanyak RM73.11 juta telah disalurkan oleh Kementerian ini bagi penyediaan infrastruktur luar bandar di Ranau merangkumi RM54.37 juta (kos projek) bagi Projek Jalan Luar Bandar (JALB) iaitu Projek Jalan Kg. Walau – Kg Tinanom, Sabah sepanjang 8km dengan spesifikasi R2 yang memberi manfaat kepada 5,000 orang penduduk, RM12.7 juta (kos projek) bagi Projek Bekalan Air Luar Bandar (BALB) Projek Bekalan Air Luar Bandar Sistem Retikulasi Tahun 2018/2019 – Bahagian Ranau) yang memberi manfaat kepada 8 buah kampung melibatkan 747 orang penduduk, RM2.65 juta (peruntukan tahun semasa) bagi Projek Jalan Perhubungan Desa (JPD) yang melibatkan sebanyak 20 buah kampung, RM2.2 juta (peruntukan tahun semasa) bagi Program Ameniti Sosial (PAMS) melibatkan pembinaan jambatan gantung, parit konkrit, dewan mini dan baik pulih jambatan bagi 10 buah kampung dan RM1.18 juta (peruntukan tahun semasa) bagi Program Perumahan Rakyat Termiskin (PPRT) yang melibatkan 5 unit bina baharu dan 56 buah baik pulih dan memberi manfaat kepada 305 orang penduduk.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' TUAN IBRAHIM TUAN MAN
[KUBANG KERIAN]
TARIKH : 05 NOVEMBER 2019 (SELASA)

SOALAN NO. 12

Y.B. DATO' TUAN IBRAHIM TUAN MAN [KUBANG KERIAN] minta **MENTERI KEWANGAN** menyatakan mengenai cadangan untuk menaikkan cukai dan duti ke atas rokok, produk tembakau, arak dan judi.

JAWAPAN

Tuan Yang di-Pertua,

Untuk makluman Ahli Yang Berhormat, barang-barang yang dikategorikan sebagai *demerit goods* seperti produk tembakau, rokok dan minuman keras dikenakan cukai tidak langsung yang meliputi duti import, duti eksais dan cukai jualan. Bagi aktiviti perjudian, antara cukai yang dikenakan adalah cukai perjudian, duti pertaruhan, duti kasino dan duti mesin slot. Pengenaan duti/cukai ini bertujuan untuk mengimbangi *externalities* negatif yang wujud kesan daripada pengambilan dan penggunaan produk dan aktiviti yang tidak digalakkan. Kerajaan sentiasa mengkaji kadar duti/cukai ke atas produk dan aktiviti tersebut dari semasa ke semasa mengikut keperluan. Sebagai contoh, kadar duti eksais ke atas produk tembakau dan rokok telah dikaji dan dinaikkan pada tahun 2015. Langkah ini adalah selaras dengan saranan di bawah *World Health Organisation Framework Convention On Tobacco Control* (WHO FCTC) supaya komponen cukai secara purata hendaklah mencapai 70% daripada harga jualan pada sekotak rokok. Bagi minuman keras, langkah menaikkan kadar duti/cukai telah dilaksanakan pada tahun 2016 di mana struktur duti eksais minuman keras telah diubah kepada bentuk spesifik berdasarkan kandungan alkohol bagi seliter produk. Selain itu, cukai jualan ke atas produk rokok dan minuman keras turut dikenakan pada kadar 10% mulai 1 September 2018 di mana ianya adalah lebih tinggi berbanding cukai jualan pada kadar 5% yang dikenakan sebelum era pelaksanaan GST.

Bagi aktiviti perjudian, Kerajaan telah melaksanakan kajian semula struktur kadar duti seperti duti kasino, duti kelab persatuan dan duti kelab syarikat serta fi dan bayaran lesen yang telahpun dinaikkan berkuatkuasa mulai 1 Januari 2019. Sebarang perancangan bagi mengkaji dan meningkatkan kadar duti/cukai memerlukan kajian menyeluruh dengan mengambil kira keberkesanan pelaksanaan langkah peningkatan duti/cukai yang sedang berkuatkuasa serta keadaan pasaran dan langkah-langkah penguatkuasaan bagi membendung aktiviti penyeludupan yang berlaku susulan kenaikan harga jualan yang disebabkan oleh faktor duti/cukai yang tinggi.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN
A/L M PARAMESWARAN [BATU]**

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan bagaimanakah Kementerian ingin menyediakan prasarana untuk belia agar kumpulan sasaran ini mampu membeli rumah kerana saban hari harga rumah semakin meningkat, jurang kemampuan semakin hari semakin meninggi dan apakah solusinya. Adakah Kementerian boleh mensyaratkan 5% ke 10% daripada jumlah perumahan baru adalah dibina untuk belia dan kawalan harga akan berlaku pada unit-unit rumah tersebut.

JAWAPAN

Tuan Yang di-Pertua,

1. Untuk makluman Yang Berhormat, Dasar Perumahan Negara (DRN) 2018 - 2025 serta Dasar Rumah Mampu Milik (DRMM) dirancang untuk memastikan semua golongan masyarakat termasuk golongan belia dapat mendiami sebuah kediaman yang selesa dan berkualiti mengikut kemampuan mereka. Pada masa ini, penetapan had umur permohonan program perumahan dan pembiayaan adalah pada umur 18 tahun dan ke atas.

2. Cadangan penetapan kuota khas untuk golongan belia merupakan satu cadangan yang perlu diteliti dan dikaji dengan lebih terperinci. DRN (2018 – 2025) dan DRMM menetapkan golongan sasaran berdasarkan pendapatan termasuk had umur untuk memperoleh pembiayaan. Maka, secara tidak langsung inisiatif perumahan kepada golongan belia turut diambil perhatian. Pada masa ini, terdapat program perumahan yang disediakan khusus untuk golongan belia iaitu Rumah Transit Belia di bawah Kementerian Perumahan dan Kerajaan Tempatan (KPKT) dan Skim Perumahan Belia di bawah Bank Simpanan Nasional (BSN).

3. Untuk makluman Yang Berhormat juga, dari sudut kawalan harga rumah di bawah DRMM, Kerajaan telah mengambil pendekatan melalui kaedah median *multiple* bagi menentukan harga rumah mampu milik. Harga rumah yang mampu dimiliki adalah tiga kali ganda pendapatan median isi rumah mengikut lokasi/negeri dan secara umumnya kerajaan telah menetapkan rumah yang berharga RM300,000.00 dan ke bawah adalah kadar harga Rumah Mampu Milik di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN ANYI NGAU [BARAM]

TARIKH : 5 NOVEMBER 2019 (SELASA)

SOALAN

Minta **MENTERI PEMBANGUNAN LUAR BANDAR** menyatakan rancangan Kerajaan untuk menyediakan kemudahan jalan raya di kawasan Baram. Mohon penjelasan sama ada kemudahan jalan raya dari Pekan Lapok/KM 10/Long San/ Long Bangga/Bario dan KM 10/Long Silat/Long Jekitan Ulu Baram serta Pekan Lapok/ Long Jegan/Long Aton akan dibina seperti yang dipohon sejak sekian lama kebelakangan ini.

JAWAPAN

Tuan Yang di-Pertua,

Untuk makluman Yang Berhormat, cadangan pembinaan jalan raya dari Pekan Lapok/KM 10/Long San/ Long Bangga/Bario dan KM 10/Long Silat/Long Jekitan Ulu Baram serta Pekan Lapok/ Long Jegan/Long Aton tidak tersenarai di dalam Senarai Keutamaan Kerajaan Negeri yang telah diterima oleh Kementerian.

Namun begitu, sekiranya terdapat keperluan mendesak, dipohon Yang Berhormat untuk mengemukakan keperluan tersebut kepada Kerajaan Negeri dan Kementerian ini supaya dimasukkan ke dalam senarai keutamaan untuk dilaksanakan di bawah Rancangan Malaysia Kedua belas (RMKe-12) akan datang. Walau bagaimanapun, pelaksanaan projek ini adalah tertakluk kepada kelulusan oleh pihak Unit Perancang Ekonomi, Kementerian Hal Ehwal Ekonomi (EPU, MEA) dan kedudukan semasa kewangan Kerajaan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB. DATUK WIRA HAJAH MAS ERMIEYATI
BINTI SAMSUDIN [MASJID TANAH]**

TARIKH : 5 NOVEMBER 2019

SOALAN

Minta **MENTERI PELANCONGAN, SENI DAN BUDAYA** menyatakan mengapakah lesen khas umrah dimansuhkan dan adakah kaedah yang baru itu masih mengekalkan syarat-syarat terdahulu seperti dari segi pemilikan, kewangan dan insurans.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian telah menguatkuasakan pindaan ke atas Peraturan-Peraturan Industri Pelancongan (Perniagaan Pengendalian Pelancongan dan Perniagaan Agensi Pengembaraan) 1992, Akta Industri Pelancongan 1992 [Akta 482] pada 1 Jun 2019.

Melalui peruntukan baharu berkaitan perniagaan pengendalian pelancongan ke luar negeri bagi umrah atau ziarah di dalam Peraturan ini, perniagaan pengendalian pakej umrah telah dijenamakan semula melalui peruntukan baharu dengan perundangan yang lebih jelas berbanding pelaksanaan lesen khas umrah bagi dua musim umrah yang lalu.

Untuk makluman Ahli Yang Berhormat, pelesenan syarikat pengendalian pakej umrah melalui peraturan baharu ini juga masih mengekalkan semua syarat-syarat terdahulu seperti dari segi pemilikan yang mewajibkan pemilikan warganegara Malaysia beragama Islam, kewangan, penekanan kepada aspek takaful perjalanan bagi melindungi perjalanan jemaah umrah dan penambahbaikan lain yang memberi manfaat kepada semua pihak berkepentingan khususnya pihak Kerajaan, industri dan orang awam.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : JAWAB LISAN

DARIPADA : DATO' SRI ABDUL AZEEZ BIN
ABDUL RAHIM [BALING]

TARIKH : 5 NOVEMBER 2019 (SELASA)

SOALAN

Minta **MENTERI PEMBANGUNAN LUAR BANDAR** menyatakan sejauh manakah status semasa pelaksanaan inisiatif Pelan Harapan Pembangunan Luar Bandar 2018-2023 dalam membasmi kadar kemiskinan khususnya di daerah Baling.

JAWAPAN

Tuan Yang di-Pertua,

Untuk makluman Yang Berhormat, Pelan Harapan Pembangunan Luar Bandar 2018 – 2023 (PHPLB) menggariskan sebanyak **enam (6) Teras** iaitu **Prasarana, Ekonomi, Keusahawanan, Modal Insan, Wanita dan Sistem Penyampaian**. Sebanyak **29 Strategi** dan **94 Program** telah dirancang bagi tempoh **lima (5) tahun** yang dijangka akan memberi manfaat kepada seramai **7.89 juta penduduk luar bandar**.

Antara inisiatif yang dirancang dan sedang dilaksanakan oleh Kementerian Pembangunan Luar Bandar (KPLB) sepanjang Tahun 2019 bagi membasmi kadar kemiskinan di daerah Baling seperti berikut:

Pelaksanaan **Skim Pembangunan Kesejahteraan Rakyat (SPKR)** sebagai salah satu *touch point* utama KPLB untuk menjaga kesejahteraan dan membasmi kemiskinan melalui **Program Perumahan Rakyat Termiskin (PPRT)**, di mana sebanyak **58 unit PPRT** dengan peruntukan sebanyak **RM1.098 juta** sedang dalam

pelaksanaan yang akan memberi manfaat kepada seramai **290 isi rumah**. Selain itu, di bawah SPKR juga, KPLB turut memberi bantuan secara *one-off* dalam bentuk peralatan dan latihan melalui **Program Peningkatan Pendapatan (PPP)** kepada seramai **16 penerima** dengan peruntukan sebanyak **RM100 ribu**.

Pelaksanaan Program Desa Harapan di Kg. Weng, Baling, Kedah merupakan salah satu inisiatif KPLB dengan kerjasama di antara sektor swasta dan korporat sebagai rakan strategik yang bertujuan untuk meningkatkan taraf hidup dan sosioekonomi masyarakat luar bandar melalui proses pembangunan desa berdasarkan konsep *Corporat Social Responsibility* (CSR). Program ini akan memberi peluang kepada masyarakat luar bandar untuk meningkatkan sumber aktiviti ekonomi melalui perkongsian strategik dengan syarikat swasta dan korporat.

Antara program dan aktiviti yang telah dilaksanakan dan sedang dalam tindakan pelaksanaan oleh rakan strategik seperti Program Latihan Keusahawanan Digital oleh Axiata Berhad, Bengkel Pengurusan Sisa Pepejal dan Pembuatan Baja Kompos oleh tenaga pakar dari Universiti Kuala Lumpur (UniKL) dan Program Latihan Jahitan oleh Sri Kandi Skill College (Siti Khadijah Holding Sdn. Bhd.) melalui sumbangan 18 buah mesin jahit dari Berjaya Corporation Berhad.

Salah satu inisiatif baharu yang telah dirancang untuk jangka masa panjang adalah memberi **tumpuan kepada pembangunan di daerah Baling yang dikategorikan sebagai daerah termiskin**. Tumpuan pembangunan bukan sahaja kepada pembangunan infrastruktur luar bandar semata-mata, malahan KPLB turut akan memberi tumpuan kepada pembangunan modal insan dan ekonomi.

Selain itu, KPLB melalui Majlis Amanah Rakyat (MARA) turut melaksanakan pelbagai **program pembangunan keusahawanan**, di mana pelaksanaan program ini adalah bertujuan memberi manfaat kepada penduduk di daerah Baling untuk menjadi seorang usahawan yang berjaya dengan secara tidak langsungnya juga dapat menyediakan peluang pekerjaan kepada masyarakat setempat.

Misalnya melalui **Program Pembiayaan Perniagaan**, MARA menyasarkan seramai **24 usahawan** dengan peruntukan sebanyak **RM1.471 juta** akan mendapat manfaat ke arah peningkatan tahap keusahawanan dalam bidang perdagangan dan perindustrian.

Manakala, seramai **63 usahawan** dengan peruntukan sebanyak **RM91 ribu** akan memperoleh manfaat melalui pelaksanaan **Latihan Pembangunan Usahawan Berstruktur** yang bertujuan untuk meningkatkan ilmu pengetahuan, kemahiran dan ciri-ciri keusahawanan bagi menjadi berdaya maju dan bersaing ke peringkat yang lebih tinggi serta seterusnya dapat mengurangkan kadar kemiskinan dan kebergantungan kepada pihak Kerajaan.

Sehubungan itu, KPLB amat yakin bahawa melalui pelaksanaan pelbagai inisiatif di dalam PHPLB ini akan dapat meningkatkan taraf kualiti hidup masyarakat selain memenuhi keperluan sosioekonomi, fizikal, rohani dan sahsiah khususnya penduduk luar bandar.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN FOONG HIN [KOTA KINABALU]

TARIKH : 5 NOVEMBER 2019 (SELASA)

SOALAN

TUAN CHAN FOONG HIN [KOTA KINABALU] minta **MENTERI KESIHATAN** menyatakan jumlah tunggakan kos rawatan yang gagal dibayar oleh warga asing di Sabah mengikut negara dan hospital dari tahun 2017 hingga 2019. Adakah Kementerian bercadang untuk memerlukan kedutaan negara asal pesakit asing untuk menjadi penjamin bagi kos rawatan, dan apakah kekangannya.

JAWAPAN

Tuan Yang di-Pertua,

Sehingga Ogos 2019, jumlah tunggakan pesakit warganegara asing di negeri Sabah adalah sebanyak RM10,362,597.60. Bagi tahun 2018, tunggakan adalah berjumlah RM14,593,937.66 manakala bagi tahun 2017, jumlah tunggakan adalah sebanyak RM9,656,942.50.

Bagi tahun 2017, Hospital Wanita Dan Kanak-Kanak Likas merupakan hospital dengan tunggakan tertinggi iaitu sebanyak RM2,940,113.00. Bagi tahun 2018, Hospital Lahad Datu dengan tunggakan RM4,062,775.00 dan sehingga Ogos 2019, tunggakan tertinggi adalah Hospital Lahad Datu dengan jumlah sebanyak RM3,209,558.50.

SOALAN NO : 17

Kementerian mengambil inisiatif untuk menangani isu berkaitan tunggakan pesakit warganegara asing yang datang mendapatkan perkhidmatan di fasiliti Kementerian Kesihatan Malaysia (KKM) dengan mengadakan kerjasama dengan Kementerian Luar Negeri (KLN). KKM juga telah menghubungi Kedutaan negara asal pesakit asing untuk mendapatkan kerjasama mereka bagi tindakan-tindakan berikut:

- a) Urusan mengambil dan menghantar balik pesakit yang di discaj dengan kadar segera atau bagi tujuan menghubungi waris terdekat kepada pesakit; dan
- b) Mengeluarkan surat pemberitahuan tunggakan warganegara asing untuk disampaikan melalui saluran diplomatik melalui KLN kepada negara-negara berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' DR. NORAINI AHMAD
[PARIT SULONG]
TARIKH : 05 NOVEMBER 2019 (SELASA)

SOALAN NO. 18

Y.B. DATO' DR. NORAINI AHMAD [PARIT SULONG] minta **MENTERI KEWANGAN** menyatakan senarai jumlah jaminan bon, kerjasama strategik, usahasama dan pinjaman yang telah diterima oleh Kerajaan dari negara Jepun selain hutang Bon Samurai yang diterbitkan sebelum ini.

JAWAPAN

Tuan Yang di-Pertua,

Bagi tempoh 1992-2011, jumlah pinjaman yang telah diterima oleh Kerajaan dari negara Jepun (selain Bon Samurai yang diterbitkan) adalah sebanyak 434.84 bilion yen atau RM15.33 bilion. Daripada jumlah pinjaman tersebut, sebanyak 47.9% (208.31 bilion yen atau RM6.84 bilion) adalah pinjaman yang dibuat oleh Kerajaan, manakala baki 52.1% (226.52 bilion yen atau RM8.49 bilion) adalah pinjaman syarikat berkaitan Kerajaan yang dijamin oleh Kerajaan.

Sehingga 30 September 2019, Kerajaan mempunyai baki pinjaman dari negara Jepun yang belum selesai berjumlah 197.11 bilion yen atau RM7.7 bilion. Daripada jumlah tersebut, 67.6% (133.17 bilion yen atau RM5.22 bilion) adalah pinjaman yang dibuat oleh Kerajaan, manakala 32.4% (63.95 bilion yen atau RM2.48 bilion) adalah pinjaman syarikat berkaitan Kerajaan yang dijamin oleh Kerajaan.

Pinjaman-pinjaman tersebut dibuat untuk tujuan program/projek pendidikan, pembangunan infrastruktur dan utiliti, serta dana pembangunan Industri Kecil dan Sederhana (IKS).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI IKMAL HISHAM
BIN ABDUL AZIZ [TANAH MERAH]**

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan berapa jumlah rumah mampu milik yang dirancang dibina sehingga akhir tahun depan.

JAWAPAN

Tuan Yang di-Pertua,

1. Untuk makluman Yang Berhormat, antara komitmen Kerajaan dalam mengutamakan pembinaan rumah mampu milik adalah melalui penyediaan 1 juta rumah mampu milik dalam tempoh 10 tahun (Julai 2018 hingga 2028). Sehingga Jun 2019, sebanyak 607,415 unit rumah sedang dalam tiga peringkat pelaksanaan iaitu 39,864 unit disiapkan, 181,211 unit dalam pembinaan dan 386,340 unit dalam perancangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TAN SRI NOH BIN OMAR
[TANJONG KARANG]
TARIKH : 05 NOVEMBER 2019 (SELASA)

SOALAN NO. 20

Y.B. TAN SRI NOH BIN OMAR [TANJONG KARANG] minta **MENTERI KEWANGAN** menyatakan berapa jumlah projek yang telah dianugerahkan secara rundingan terus dan tender terpilih bermula Mei 2018 hingga September 2019.

JAWAPAN

Tuan Yang di-Pertua,

Untuk makluman Dewan yang mulia ini, proses pengurusan perolehan Kerajaan adalah dilaksanakan berteraskan kepada lima prinsip utama iaitu, pertama; akauntabiliti awam, kedua; diuruskan secara telus, ketiga; memberi nilai faedah yang terbaik, keempat; mewujudkan saingan terbuka dan terakhir; mestilah adil dan saksama. Tatacara perolehan yang digunapakai oleh Kerajaan adalah berdasarkan amalan terbaik perolehan awam di peringkat antarabangsa yang mana semua proses perolehan perlu dilaksanakan secara terbuka.

Peraturan perolehan yang berkuat kuasa menetapkan mana-mana perolehan Kerajaan yang nilainya melebihi RM500,000 perlu dilaksanakan secara tender terbuka. Peraturan ini diperkemaskan lagi melalui surat arahan oleh Kementerian Kewangan bertarikh 29 Jun 2018 yang memansuhkan kaedah perolehan secara tender terhad (tender terpilih) dan digantikan dengan kaedah tender terbuka pra-kelayakan.

Untuk makluman Dewan yang mulia juga, sepertimana amalan di peringkat antarabangsa dan demi kepentingan nasional, kaedah perolehan secara rundingan terus akan hanya dipertimbangkan bagi perolehan yang melibatkan lima (5) kriteria khusus dan bukannya dibenarkan secara am seperti berikut:

1. perolehan bekalan/ perkhidmatan melibatkan keperluan mendesak yang mana jika perolehan tersebut tidak dilaksanakan dengan segera, ia boleh memudaratkan dan menjejaskan perkhidmatan serta kepentingan Negara;
2. keperluan penyeragaman bagi memastikan kesesuaian penggunaan (*compatibility*) antara barangan sedia ada dengan barangan baru yang akan diperolehi;
3. satu punca bekalan/ perkhidmatan iaitu pengeluaran produk atau penyediaan perkhidmatan hanya boleh dibekalkan daripada satu sumber sahaja;

4. keselamatan/ strategik yang melibatkan perolehan item atau perkhidmatan demi keselamatan atau kepentingan strategik negara; atau
5. kontrak dengan syarikat pembuat (*manufacturer*) Bumiputera yang memenuhi semua syarat kelayakan.

Semua permohonan perolehan secara rundingan terus perlu dikemukakan oleh Kementerian/Jabatan kepada Kementerian Kewangan.

Antara langkah-langkah yang telah diambil oleh Kementerian Kewangan demi meningkatkan ketelusan dalam proses perolehan adalah seperti berikut:

1. Semua keputusan perolehan termasuk secara rundingan terus yang dilaksanakan oleh Kementerian/ Agensi telah dipaparkan di portal MyProcurement kecuali perolehan-perolehan yang melibatkan kepentingan strategik dan keselamatan negara;
2. Memperkenalkan dasar yang komprehensif mengenai pendedahan konflik kepentingan semasa proses perolehan melalui Pekeliling Perbendaharaan mengenai *Integrity Pact*; dan
3. Meningkatkan penggunaan mandatori sistem perolehan berasaskan teknologi atau sistem ePerolehan untuk mengurangkan intervensi manusia dalam proses perolehan.

Untuk makluman Dewan yang mulia ini juga, Kerajaan masih mengekalkan Dasar Keutamaan kepada Syarikat Bumiputera sepertimana yang ditetapkan dalam Pekeliling Perbendaharaan yang berkuat kuasa. Keutamaan ini diberikan kepada syarikat Bumiputera, pembuat/pengilang Bumiputera, pengimport Bumiputera dan kontraktor Bumiputera, antaranya seperti Agensi Kerajaan hendaklah memperuntukkan sekurang-kurangnya 30% daripada nilai kerja tahunan dan pemberian keutamaan harga (*margin of preference*) antara 2.5% hingga 10% bagi perolehan bekalan dan perkhidmatan yang dilaksanakan secara tender terbuka.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG KAH WOH
[IPOH TIMUR]
TARIKH : 05 NOVEMBER 2019 (SELASA)

SOALAN NO. 21

Y.B. TUAN WONG KAH WOH [IPOH TIMUR] minta **MENTERI KEWANGAN** menyatakan senarai perbadanan yang telah dilucut hak kedudukan pengecualian cukai di bawah Seksyen 44(6) Akta Cukai Pendapatan dan sama ada behasrat untuk meminda Seksyen 44 tersebut supaya ia adalah lebih tepat pada kegunaan atau perlaksanaan semasa.

JAWAPAN

Tuan Yang di-Pertua,

Untuk makluman Ahli Yang Berhormat, sehingga 18 Oktober 2019, sebanyak 1,263 institusi atau organisasi telah ditarik balik dari status pengecualian di bawah Seksyen 44(6), Akta Cukai Pendapatan 1967. Ini adalah hasil daripada pengauditan yang sentiasa dijalankan oleh Lembaga Hasil Dalam Negeri Malaysia (LHDNM) untuk memastikan semua syarat dipatuhi oleh institusi atau organisasi yang diluluskan.

Kementerian Kewangan akan sentiasa menambah baik peruntukan di bawah Seksyen 44(6), Akta Cukai Pendapatan 1967 sekiranya terdapat keperluan dan selaras dengan perkembangan sosioekonomi semasa. Sebagai contoh, dalam Belanjawan 2020 yang baru-baru ini, Kerajaan telah menaikkan had potongan di bawah Seksyen 44(6), Akta Cukai Pendapatan 1967 iaitu daripada 7% kepada 10% yang berkuatkuasa mulai tahun taksiran 2020.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA,
PENGAL KEDUA, PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 5 NOVEMBER 2019 (SELASA)

SOALAN

Minta **MENTERI PEMBANGUNAN USAHAWAN** menyatakan program-program “*Business Online*” perniagaan atas talian di bawah seliaan Kerajaan dan bentuk bantuan dan kursus yang disediakan kepada rakyat Malaysia dalam usaha mewujudkan peluang pekerjaan dan meningkatkan pendapatan rakyat khususnya kepada golongan Bumiputera dan B40.

JAWAPAN

Tuan Yang Dipertua,

MED melalui SME Corp. Malaysia melaksanakan pelbagai program untuk membantu usahawan dan syarikat PKS daripada peringkat permulaan perniagaan sehinggalah ke pasaran eksport termasuklah dalam meningkatkan aktiviti e-dagang. Bantuan diberikan secara bersepadu dan meliputi khidmat nasihat dan bantuan kewangan sama ada dalam bentuk geran atau pinjaman mudah.

Ini termasuk kerjasama strategik bersama-sama agensi, persatuan dan rakan strategik e-Dagang melalui aspek pembangunan dan latihan dalam bidang e-Dagang. Bagi tahun 2018 sejumlah 56,182 PKS telah dilatih dalam bidang e-Dagang.

Program Tunas Belia Bumiputera (TUBE) yang dilaksanakan oleh SME Corp., merupakan satu program penggalakan penyertaan belia dalam bidang keusahawanan melalui latihan. Program ini juga meliputi latihan berkaitan e-Dagang melalui kerjasama dengan MDEC bertujuan memberi peluang kepada belia Bumiputera untuk menjalankan perniagaan secara atas talian. Sejak program ini dilaksanakan pada tahun 2014 sehingga 2018, ia telah melibatkan penyertaan seramai 4,422 orang belia Bumiputera dengan 4,381 (99%) daripada mereka telah mendaftarkan perniagaan dan memulakan operasi perniagaan. Sehingga kini, melalui perniagaan yang dijalankan, mereka telah berjaya mencatatkan jualan terkumpul berjumlah RM99.28 juta dan mewujudkan 7,852 jumlah pekerjaan.

SME Corp. Malaysia turut menganjurkan Program *Women Netpreneur* yang bertujuan untuk membantu usahawan wanita memanfaatkan teknologi bagi memulakan dan mengembangkan perniagaan mereka secara atas talian. Program *Women Netpreneur 2018/2019: eCommerce adoption* merupakan satu siri taklimat dan bengkel yang diadakan dengan kerjasama persatuan wanita iaitu *Gorgeous Geek*. Menerusi program tersebut, pelbagai penyedia platform dalam talian (*online platform provider*) seperti Lazada, Shopee, TM dan Easy Parcel berkongsi maklumat terkini tentang cara-cara menjalankan perniagaan dalam talian. Peserta tidak dikenakan sebarang bayaran untuk menghadiri program ini.

Sejumlah 7 sesi program *Women Netpreneur* telah dijalankan pada tahun 2018 dan 2019 di beberapa lokasi terpilih di Semenanjung Malaysia, Sabah dan Sarawak. Sehingga September 2019, program ini telah memberi manfaat kepada 723 orang usahawan wanita. Sejumlah 2 sesi program lagi akan dijalankan pada bulan Oktober dan November 2019 di Kuala Lumpur dan Kuching.

Kerajaan melalui Institut Keusahawanan Negara Berhad (INSKEN) turut menawarkan program-program latihan teknikal keusahawanan jangka pendek berbentuk *outcome-based*. Antara program latihan teknikal keusahawanan berkaitan perniagaan atas talian adalah seperti berikut:

- a. Pemasaran menggunakan Platform *e-Marketplace* seperti *Shopee*,

Lazada dan MyBazaar

- b. *FB Ads (Pemasaran Media Sosial)*
- c. *Google Ads (Pemasaran Media Sosial)*
- d. *Instagram (Pemasaran Media Sosial)*
- e. *Buat Duit Dari Youtube*
- f. *Menghasilkan Video Pemasaran Menggunakan Smartphone*

Buat masa ini, Program Keusahawanan untuk golongan B40 yang ditawarkan oleh INSKEN adalah melalui program berbentuk bimbingan dan latihan *coaching/mentoring* selama 4 bulan menerusi program :

- a. *INSKEN Business Coaching: Postnatal Care*
- b. *INSKEN Business Coaching: SPA*
- c. *INSKEN Business Coaching: Homestay*
- d. *INSKEN Business Coaching: Tailoring*

Selain daripada itu, pihak INSKEN juga terlibat di dalam Projek Rintis Usahawan Tani Fertigasi (PRINT). Program pembangunan kapasiti keusahawanan ini dapat membantu usahawan-usahawan B40 yang menjalankan perniagaan dalam bidang asas tani di Terengganu. Menerusi program PRINT ini, para usahawan dapat menambahbaik sistem tanaman (fertigasi) secara digital, meningkatkan tahap kemajuan perniagaan mereka ke tahap yang lebih tinggi, di samping meningkatkan jualan hasil pertanian dan menyumbang kepada pewujudan peluang pekerjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN AWANG HUSAINI BIN SAHARI
[PUTATAN]
TARIKH : 5 NOVEMBER 2019 (SELASA)

SOALAN NO. 23

Y.B. TUAN AWANG HUSAINI BIN SAHARI [PUTATAN] minta **MENTERI KEWANGAN** menyatakan adakah Kerajaan telah menetapkan peratus penglibatan kontraktor-kontraktor tempatan di dalam projek-projek mega seperti Projek Laluan Rel Pantai Timur (ECRL), *High Speed Rail (HSR)*, MRT 2 dan lain-lain lagi yang telah dianugerahkan kepada syarikat-syarikat gergasi daripada negara China. Memandangkan kesediaan kontraktor-kontraktor tempatan untuk terlibat sama untuk berkecimpung di dalam projek mega ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan sentiasa memberi peluang kepada kontraktor-kontraktor tempatan untuk terlibat sama di dalam pelaksanaan projek-projek mega Kerajaan antaranya Projek Laluan Rel Pantai Timur (ECRL), Projek Keretapi Laju Kuala Lumpur-Singapura (HSR) dan Projek Mass Rapid Transit (MRT) Laluan Sungai Buloh-Serdang-Putrajaya (SSP) atau dikenali sebagai MRT 2.

Kerajaan baru-baru ini telah mengumumkan penyambungan semula Projek ECRL setelah Perjanjian Tambahan di antara Malaysia Rail Link (MRL) dan China Communications Construction Company Ltd (CCCC)

dimeterai pada 12 April 2019. Perjanjian yang ditambah baik ini melibatkan kos projek yang lebih rendah iaitu sebanyak RM44.0 bilion berbanding kos asal projek sebanyak RM65.5 bilion. Di bawah Perjanjian baharu ini, peratusan bagi syarikat pembinaan tempatan untuk menyertai kerja-kerja sivil (tidak termasuk kerja-kerja terowong) bagi projek ECRL turut meningkat kepada 40 peratus berbanding 30 peratus sebelum ini.

Program pendaftaran dan penyerahan dokumen Pra-Kelayakan ECRL telah diadakan pada 29 dan 30 Mei 2019 yang lalu oleh CCCC dalam usaha mengenal pasti sub kontraktor tempatan yang berpotensi untuk mengambil bahagian dalam 40 peratus kerja-kerja sivil (tidak termasuk kerja-kerja terowong) bagi projek ECRL. Jawatankuasa Penilaian Pra-Kelayakan ECRL telah mengenal pasti 234 syarikat atau 70.7 peratus daripada 331 syarikat pembinaan yang telah disenarai pendek merupakan syarikat milik Bumiputera.

Bagi Projek MRT Laluan 2 (SSP), sebanyak 46 daripada 51 pakej kerja telah dianugerahkan kepada kontraktor-kontraktor tempatan. Daripada jumlah berkenaan, keseluruhan 44 pakej kerja yang melibatkan kerja-kerja sivil telah dianugerahkan kepada kontraktor-kontraktor tempatan, manakala 2 pakej kerja berkenaan sistem juga diberi kepada kontraktor-kontraktor tempatan. Selain itu, satu lagi syarat yang telah dikenakan oleh MRT Corp ke atas syarikat asing yang terlibat dengan Projek MRT Lembah Klang adalah Program Kerjasama Industri (*Industrial Collaboration Programme*) di mana kontraktor-kontraktor asing diwajibkan mewujudkan inisiatif-inisiatif yang akan membantu pertumbuhan ekonomi Malaysia melalui perkembangan sektor industri pengangkutan rel. Ini adalah sejajar dengan seruan pihak Kerajaan untuk memastikan penglibatan syarikat tempatan dalam projek-projek mega negara agar syarikat-syarikat tempatan mampu untuk melibatkan diri tanpa bergantung kepada syarikat-syarikat asing bagi projek-projek mega negara di masa hadapan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI REEZAL MERICAN B. NAINA
MERICAN
[KEPALA BATAS]
TARIKH : 05 NOVEMBER 2019 (SELASA)

SOALAN NO. 24

Y.B. DATO' SERI REEZAL MERICAN B. NAINA MERICAN [KEPALA BATAS]
minta **MENTERI KEWANGAN** menyatakan fi pengurusan (management fees)
yang dibayar masing-masing kepada Mizuho Bank, HSBC dan Daiwa Capital
sebagai "lead arrangers" kepada Bon Samurai.

JAWAPAN

Tuan Yang di-Pertua,

Bagi melaksanakan penerbitan bon Samurai, pemilihan *Joint Lead Arrangers* (JLAs) telah dilaksanakan secara *Request For Proposal* (RFP). Lanjutan daripada itu, Kerajaan Malaysia telah melantik tiga buah bank sebagai JLAs iaitu Mizuho Bank (Malaysia) Berhad, HSBC Bank Malaysia Berhad dan Affin Hwang Investment Bank Berhad dengan kerjasama Daiwa Securities Group Inc..

Setiap JLAs bertanggungjawab untuk melaksanakan tugas yang diberikan dan pembahagian tugas adalah berdasarkan kepakaran masing-masing. Tanggungjawab bank berkenaan adalah seperti memastikan dokumen perundangan yang berkaitan dikemas kini mengikut prosedur, mengurus logistik dan menyediakan dokumen semasa sesi bertemu pelabur di Jepun serta mengetuai sesi pemasaran dan penetapan harga bagi terbitan tersebut. Kementerian telah melakukan beberapa siri libat urus bersama bank yang telah disenarai pendek sebagai JLAs bagi membincangkan beberapa perkara mengenai terbitan bon Samurai, termasuk bayaran fi pengurusan.

Majoriti bank tersebut mengenakan bayaran fi pengurusan dalam lingkungan 0.075% hingga 0.100% daripada jumlah terimaan kasar. Walau bagaimanapun, Kementerian Kewangan telah merunding kadar fi pengurusan yang lebih rendah. Oleh itu, fi pengurusan bagi ketiga-tiga JLAs adalah sebanyak 0.051% daripada jumlah terimaan kasar iaitu sebanyak RM3.7 juta dan dibayar setelah bon Samurai berjaya diterbitkan pada 15 Mac 2019.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG HON WAI
[BUKIT BENDERA]
TARIKH : 05 NOVEMBER 2019 (SELASA)

SOALAN NO. 25

Y.B. TUAN WONG HON WAI [BUKIT BENDERA] minta **MENTERI KEWANGAN** menyatakan senarai aset-aset luar negara dan dalam negara skandal 1MDB yang telah dikembalikan kepada Kerajaan sejak Mei 2018 dan apakah usaha-usaha yang sedang dijalankan untuk mendapat balik aset-aset skandal 1MDB.

JAWAPAN

Tuan Yang di-Pertua,

Seperti mana umum sedia maklum, Kerajaan telah menyatakan komitmen untuk mendapatkan semula dana/ aset 1Malaysia Development Bhd (1MDB) yang didakwa telah diseleweng.

Bagi tujuan tersebut, Jabatan Peguam Negara dan pihak berkuasa Malaysia telah bekerjasama dengan pihak berkuasa asing dari negara-negara, antaranya seperti Singapura, Indonesia, Amerika Syarikat dan Switzerland untuk memulihkan dan membawa balik dana yang diseleweng dari 1MDB serta aset yang dibeli dengan menggunakan dana 1MDB.

Hasil daripada kerjasama tersebut, berikut merupakan antara perkara yang telah dicapai:

1. Pada bulan Ogos 2018 dan Mac 2019, mahkamah di Singapura telah mengarahkan supaya dana berkaitan 1MDB yang dirampas sebanyak SGD50 juta dipulangkan semula kepada Malaysia;
2. Pada bulan April 2019, Jabatan Kehakiman Amerika Syarikat (DOJ) telah mengembalikan dana sebanyak USD57,036,688.68 (jumlah bersih) ke Malaysia hasil daripada perjanjian penyelesaian dengan Red Granite Pictures berhubung hak perfileman mereka;
3. Pada bulan Mei 2019, DOJ telah mengembalikan dana sebanyak USD137,283,889.95 (jumlah bersih) ke Malaysia hasil daripada penjualan kepentingan Jho Low di dalam Park Lane Hotel;
4. Kapal Equanimity telah dijual kepada pembida tertinggi iaitu Genting Malaysia Bhd dengan harga USD126 juta (kira-kira RM527.4 juta). Hasil jualan tersebut telah diterima sepenuhnya pada 23 April 2019 dan kini disimpan di dalam *Sheriff's Stakeholder Account* bagi tujuan penyesuaian dengan tuntutan perbelanjaan penyelenggaraan kapal yang akan ditentukan melalui Perintah Mahkamah. Baki hasil jualan

setelah ditolak jumlah perbelanjaan yang terlibat dijangka akan didepositkan ke dalam *Assets Recovery Account* pada suku tahun keempat tahun 2019.

5. Pada 30 Oktober 2018, Kerajaan telah memfailkan permohonan bagi pihak Menteri Kewangan Diperbadankan (MKD) dan 1MDB di Mahkamah Tinggi di London, England untuk mengetepikan *Consent Award* bertarikh 9 Mei 2017 yang telah direkodkan oleh *London Court of International Arbitration* (LCIA) dalam prosiding timbang tara yang melibatkan International Petroleum Investment Corporation (IPIC), Aabar Investments PJS (Aabar PJS), 1MDB dan MKD atas dasar pembuatan *Award* tersebut telah terjejas oleh *fraud* dan/atau bercanggah dengan dasar awam. Berdasarkan *Consent Award*, 1MDB dan MKD, antara lain, terdedah (*exposed*) kepada obligasi pembayaran berbentuk tunai dan indemniti, secara kumulatifnya (*cumulatively*), lebih kurang sebanyak USD5.78 bilion kepada IPIC dan Pemegang Bon. Pada masa ini, prosiding mahkamah masih berjalan. Sekiranya permohonan ini berjaya, 1MDB dan MKD akan terlepas daripada pendedahan tersebut di bawah *Consent Award*. Ini merupakan langkah yang perlu diambil dalam proses untuk mempertikaikan keseluruhan perjanjian penyelesaian bertarikh 24 April 2017 antara IPIC, Aabar PJS, 1MDB dan MKD yang turut mengandungi terma-terma lain;
6. Pada bulan Mac 2019, satu permohonan saman pelucutan hak di bawah Akta Pencegahan Pengubahan Wang Haram dan Pencegahan Pembiayaan Keganasan 2001 (AMLA) telah difailkan terhadap bapa Jho Low, iaitu Low Hock Peng di mana Kerajaan berusaha untuk mendapatkan semula dana daripada pelbagai akaun yang bernilai kira-kira RM48 juta;
7. Pada bulan Mei 2019, satu permohonan saman pelucutan hak terhadap bekas Perdana Menteri, YBhg. Dato' Sri Mohd Najib Tun Abdul Razak dan 17 yang lain telah difailkan bagi merampas pelbagai aset yang dianggarkan bernilai lebih RM133 juta. Prosiding mahkamah berkaitan perkara ini masih dijalankan; dan
8. Pada bulan Jun 2019, Suruhanjaya Pencegahan Rasuah Malaysia (SPRM) telah memfailkan 41 permohonan pelucutan hak terhadap pelbagai entiti dan individu bagi mendapatkan semula dana berkaitan 1MDB berjumlah

RM270 juta. Dana ini adalah tambahan kepada dana berjumlah lebih RM1 juta yang telah dikesan dan secara sukarela telah diserahkan melalui SPRM oleh pelbagai entiti.

Sehingga 30 September 2019, jumlah dana berkaitan 1MDB yang telah berjaya didapatkan kembali dan didepositkan ke dalam *Assets Recovery Account* di bawah Kementerian Kewangan dan 1MDB adalah sebanyak kira-kira RM925.1 juta (termasuk RM6.1 juta yang dipulangkan kepada Yayasan 1MDB). Dana ini telah diperoleh dalam pelbagai mata wang asing termasuk dolar AS, dolar Singapura, dolar Australia dan China Renminbi.

Jumlah tersebut tidak termasuk hasil jualan Kapal Equanimity sebanyak kira-kira USD126 juta (RM529.2 juta) yang telah diterima sepenuhnya pada 23 April 2019 dan kini disimpan di dalam *Sheriff's Stakeholder Account* bagi tujuan penyesuaian dengan tuntutan perbelanjaan penyelenggaraan kapal yang akan ditentukan melalui Perintah Mahkamah. Baki hasil jualan setelah ditolak jumlah perbelanjaan yang terlibat dijangka akan didepositkan ke dalam *Assets Recovery Account* pada suku tahun keempat tahun 2019.

Secara keseluruhannya, jumlah dana berkaitan 1MDB yang telah berjaya didapatkan kembali adalah sebanyak kira-kira RM1.45 bilion.

Proses untuk mendapatkan semula dana 1MDB yang telah diseleweng sedang berjalan dan ia merupakan suatu proses yang rumit dan panjang yang boleh memakan masa bertahun lamanya. Ini kerana ia bukan sahaja melibatkan kerjasama di antara pelbagai agensi tempatan dengan pelbagai agensi asing dari pelbagai negara, malahan ia turut melibatkan proses perundangan di mahkamah negara asing. Namun, Kerajaan melalui Kementerian Kewangan, Jabatan Peguam Negara dan pihak berkuasa yang lain akan terus berusaha untuk mendapatkan semula semua dana 1MDB yang telah diseleweng sama ada melalui individu atau syarikat tertentu serta membawa semua pesalah kes kleptokrasi terbesar ini ke muka pengadilan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SRI HASAN BIN ARIFIN
[ROMPIN]
TARIKH : 5 NOVEMBER 2019 (SELASA)

SOALAN NO. 26

Y.B. DATO' SRI HASAN BIN ARIFIN [ROMPIN] minta **MENTERI KEWANGAN** menyatakan apakah langkah-langkah awal yang dilakukan oleh Kerajaan dan Bank Negara Malaysia jika berlaku perang mata wang di antara China dan Amerika. Adakah Kerajaan bersedia menghadapi beberapa kemungkinan yang akan berlaku jika perang mata wang tersebut benar-benar berlaku.

JAWAPAN

Tuan Yang di-Pertua,

1. Sehingga 5 November 2019, nilai ringgit telah menyusut sebanyak 0.06 peratus. Prestasi ringgit adalah sejajar dengan pergerakan kebanyakan mata wang serantau lain yang telah berubah nilai dalam lingkungan -5 peratus dan 7 peratus berbanding dolar Amerika Syarikat (AS). Penyusutan nilai ringgit disebabkan oleh ketegangan geopolitik dan kemerosotan keyakinan pelabur dalam pasaran kewangan dunia berikutan ketidaktentuan pertumbuhan global.
2. Dalam keadaan pasaran kewangan global yang tidak menentu, kadar pertukaran ringgit yang fleksibel memainkan peranan penting sebagai penyerap kejutan luaran tanpa menjejaskan aktiviti ekonomi

domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Sehubungan itu, Kerajaan melalui Bank Negara Malaysia (BNM) sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah untuk memastikan kecairan mencukupi, pasaran yang berdaya tahan dan mengurangkan aktiviti spekulasi dalam pasaran.

3. Langkah ini termasuk menetapkan syarat supaya sebahagian besar daripada hasil eksport dalam mata wang asing ditukarkan kepada ringgit bagi meningkatkan mudah tunai wang asing dalam pasaran dalam negeri dan meningkatkan penguatkuasaan ke atas peraturan tukaran asing sedia ada bagi mencegah aktiviti spekulasi mata wang ringgit diniagakan di luar pesisir. Pada masa sama, BNM telah memperkenalkan instrumen pelindung nilai (*hedging instruments*) dan menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik.

4. Dalam jangka masa panjang, nilai ringgit akan didorong terutamanya oleh asas ekonomi negara yang kukuh. Oleh yang demikian, Malaysia akan menumpukan usaha untuk meningkatkan daya tahan ekonomi dengan mempelbagaikan sumber ekonomi serta memperkukuh daya saing ekonomi dan kedudukan fiskal negara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DR. KELVIN YII LEE WUEN
[BANDAR KUCHING]
TARIKH : 5 NOVEMBER 2019 (SELASA)

SOALAN NO. 27

Y.B. DR. KELVIN YII LEE WUEN [BANDAR KUCHING] minta **MENTERI KEWANGAN** menyatakan tentang progres perlaksanaan “insurans kesihatan” MySALAM untuk golongan B40 dan bagaimana program ini dapat diperkembangkan dan digalakkan di kalangan golongan yang berhak dan memerlukannya.

JAWAPAN

Tuan Yang di-Pertua,

Untuk makluman Ahli Yang Berhormat, Skim Perlindungan Kesihatan Nasional mySalam (mySalam) adalah inisiatif Kerajaan yang diperkenalkan pada Belanjawan tahun 2019 bertujuan menyediakan perlindungan kesihatan takaful percuma kepada individu B40 yang juga penerima Bantuan Sara Hidup (BSH) berumur 18 hingga 55 tahun, serta pasangan mereka. Berdasarkan rekod sehingga 25 September 2019, jumlah tuntutan yang telah diluluskan di bawah Skim mySalam adalah sebanyak 8,600 tuntutan dengan jumlah yang telah dibayar sebanyak RM3,196,400. Daripada 8,600 tuntutan yang diluluskan, 6,126 adalah merupakan tuntutan bagi manfaat hospitalisasi manakala 2,474 adalah bagi manfaat penyakit kritikal.

Di bawah Belanjawan 2020, Skim mySalam telah diperkembangkan untuk merangkumi penerima BSH berumur 18 hingga 65 tahun berbanding dengan 55 tahun sekarang, yang akan memberi manfaat tambahan kepada 1.5 juta individu. Selain itu, perlindungan ke atas penyakit kritikal ditingkatkan daripada 36 penyakit sedia ada kepada 45 penyakit. Akhirnya, individu yang mempunyai pendapatan kasar tahunan sehingga RM100 ribu akan menerima perlindungan di bawah mySalam yang akan memanfaatkan 5 juta individu.

Pasukan mySalam telah bergerak dari satu lokasi ke lokasi lain secara aktif bagi mempromosikan dan meningkatkan kesedaran tentang Skim ini. Keberkesanan program promosi dan kesedaran ini dapat dilihat dengan kenaikan jumlah tuntutan dari bulan ke bulan dan dijangkakan akan terus naik dengan segala aktiviti-aktiviti lanjutan yang telah dirancang oleh pasukan mySalam untuk bulan-bulan seterusnya.

Pasukan mySalam juga sedang dalam proses untuk bekerjasama dengan pihak *Urban Transformation Centre* (UTC) di seluruh Malaysia bagi mengembangkan dan mempertingkatkan kesedaran tentang manfaat mySalam serta dalam proses menyediakan kiosk perkhidmatan di hospital utama seluruh negara secara berperingkat dan dijangkakan setiap negeri akan mempunyai kiosk ini pada penghujung tahun 2019.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK AARON AGO ANAK
DAGANG [KANOWIT]
TARIKH : 5 NOVEMBER 2019 (SELASA)

SOALAN NO. 28

Y.B. DATUK AARON AGO ANAK DAGANG [KANOWIT] minta **MENTERI KEWANGAN** menyatakan keadaan sebenar berkenaan dengan hutang/pinjaman (jumlah, tempoh, tujuan pinjaman) negeri Sarawak dengan Kerajaan Pusat.

JAWAPAN

Tuan Yang di-Pertua,

Untuk makluman Ahli Yang Berhormat, jumlah pinjaman yang diluluskan Kerajaan Persekutuan kepada Kerajaan Negeri Sarawak sehingga 30 September 2019 adalah berjumlah RM5,409.79 juta dengan purata tempoh pinjaman di antara 5 tahun sehingga 30 tahun. Pinjaman ini bertujuan membiayai projek-projek kemudahan asas untuk faedah rakyat seperti projek Bekalan Air, Perumahan Awam Kos Rendah (PAKR), Perbadanan Kemajuan Ekonomi Negeri (PKEN) dan lain-lain lagi projek pelbagai.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI DR. SANTHARA
[SEGAMAT]
TARIKH : 5 NOVEMBER 2019 (SELASA)

SOALAN NO. 29

Y.B. DATO' SERI DR. SANTHARA [SEGAMAT] minta **MENTERI KEWANGAN** menyatakan berapa banyak cukai haram (*sin tax*) yang dikutip bagi tempoh Mei 2018 hingga September 2019.

JAWAPAN

Tuan Yang di-Pertua,

Untuk makluman Ahli Yang Berhormat, hasil kutipan cukai tidak langsung yang diterima bagi produk *demerit* yang terdiri daripada produk tembakau, rokok dan minuman keras serta aktiviti perjudian yang telah diterima oleh Kerajaan bagi tempoh Mei 2018 sehingga September 2019 adalah seperti berikut:

Rokok dan Tembakau	Minuman Keras	Aktiviti Perjudian
RM4.4 bilion	RM3.6 bilion	RM4.5 bilion

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SERI HISHAMMUDDIN BIN TUN
HUSSEIN [SEMBRONG]**

TARIKH : 5 NOVEMBER 2019 (SELASA)

SOALAN

Minta **MENTERI PEMBANGUNAN LUAR BANDAR** menyatakan apakah alternatif bagi meningkatkan ekonomi masyarakat kampung di saat harga penanaman komoditi sawit dan getah yang kurang memberangsangkan.

JAWAPAN

Tuan Yang di-Pertua,

Untuk makluman Ahli Yang Berhormat, pelbagai projek/program telah dirancang dan dilaksanakan oleh Kementerian Pembangunan Luar Bandar (KPLB) untuk meningkatkan ekonomi masyarakat kampung. Begitu juga dengan pelaksanaan pelbagai inisiatif/usaha juga telah diambil untuk membantu masyarakat pekebun kecil/petani oleh beberapa Kementerian/agensi lain seperti Kementerian Pertanian dan Industri Asas Tani dan Kementerian Hal Ehwal Ekonomi melalui agensi masing-masing seperti RISDA, FELCRA dan juga FELDA.

Di bawah KPLB, antara projek yang dilaksanakan adalah seperti Program Aktiviti Ekonomi Tambahan (AET) dan Projek Bersepadu Pembangunan Ekonomi Kampung (PROSPEK) yang bertujuan menjana pendapatan tambahan ketika harga komoditi yang kini kurang memberangsangkan.

Melalui Program AET, pendapatan sampingan diperolehi melalui aktiviti pertanian, ternakan dan ekonomi desa yang dilaksanakan sendiri oleh pekebun kecil/masyarakat kampung. Program ini turut melahirkan lebih ramai usahawan, meningkatkan pendapatan isi rumah dan pertambahan peluang pekerjaan. Pada tahun ini, lebih 3,600 peserta di pelbagai agensi rangkaian KPLB seperti Lembaga Penyatuan dan Pemulihan Tanah Sarawak (SALCRA), Jabatan Pertanian Sarawak (JPS), Lembaga Industri Getah Sabah (LIGS) dan Lembaga Kemajuan Tanah Negeri Sabah (SLDB) telah menerima manfaat di bawah program AET dengan peningkatan purata pendapatan tambahan daripada RM200.00 hingga RM1,500.00 sebulan.

Tuan Yang di-Pertua,

Projek PROSPEK pula merupakan projek baru kementerian yang memberi penekanan kepada pembangunan ekonomi insitu melalui penggabungan tanah terbiar di kampung-kampung sedia ada dengan aktiviti ekonomi secara berskala besar (*niche product*).

Dua projek rintis telah dilaksanakan pada tahun 2018 iaitu di PROSPEK Rintis Kg. Sidam, Kulim, Kedah dan PROSPEK Rintis Kg. Pasir Raja di Daerah Dungun Terengganu. PROSPEK Rintis Kg. Sidam ini menumpukan kepada tanaman jagung (keluasan 50 ekar) sebagai *niche product*. Melalui tanaman jagung ini, pelbagai aktiviti ekonomi hiliran jagung dapat dilaksanakan seperti penghasilan silaj, jagung lerai, bertih jagung dan sebagainya. Manakala bagi PROSPEK Rintis Kg. Pasir Raja pula menumpukan kepada penternakan ikan air tawar (lebih 50 kolam) sebagai komponen ekonomi utama sebelum diproses menjadi produk hiliran.

Kementerian juga sedang dalam tindakan memperluaskan pelaksanaan PROSPEK meliputi lima(5) negeri lain iaitu Perak, Pahang, Kelantan, Sarawak dan Sabah pada tahun 2020.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB TUAN YAMANI HAFEZ BIN MUSA
KAWASAN : SIPITANG
TARIKH : 05 NOVEMBER 2019 (SELASA)

SOALAN :

YB TUAN YAMANI HAFEZ BIN MUSA minta **MENTERI KERJA RAYA** menyatakan proses penyerapan kakitangan syarikat PDP yang melaksana projek Lebuhraya Pan Borneo di Sabah dan Sarawak berikutan pengambil alihan oleh JKR sebagai pelaksana projek, dan bagaimana lanjutan pelaksanaan beberapa bahagian yang belum diberikan lagi.

JAWAPAN :

Tuan Yang Di-Pertua,

Untuk makluman Ahli Yang Berhormat, selaras dengan usaha Kerajaan untuk mengoptimumkan kos projek-projek yang memberi implikasi yang tinggi kepada negara, mekanisme pelaksanaan projek Lebuhraya Pan Borneo telah diteliti semula dengan mengekalkan spesifikasi dan skop asal. Berikutan itu Kerajaan telah bersetuju dengan penamatan Perjanjian Rakan Pelaksana Projek (*Project Delivery Partner Agreement* – PDP) dan kos pelaksanaan projek dapat dikurangkan dengan tiadanya pembayaran yuran PDP.

Sehubungan itu, Kerajaan akan menggunakan kepakaran teknikal sedia ada melalui JKR Negeri Sabah dan Sarawak dalam melaksanakan projek secara konvensional. Bagi memastikan kesinambungan pelaksanaan projek, Kerajaan berhasrat untuk mengekalkan Kontraktor Pakej Kerja (*Works Package Contractor*) dan perunding (*consultants*) sedia ada berdasarkan terma-terma yang dipersetujui. Selain itu, cadangan penyerapan kakitangan PDP adalah tertakluk kepada kontrak berkaitan, sama ada dapat diserapkan ke dalam JKR, kontraktor pakej kerja atau perunding. Buat masa ini, JKR Sabah sedang mengenalpasti dan mempertimbangkan kakitangan-kakitangan PDP yang berkaitan untuk diserapkan ke dalam pasukan projek Pan Borneo di Sabah.

Untuk makluman Ahli Yang Berhormat juga, Kerajaan akan tetap meneruskan pelaksanaan 11 pakej kerja Projek Lebuhraya Pan Borneo Sarawak dan 15 pakej kerja Projek Lebuhraya Pan Borneo Sabah. Manakala baki 20 pakej kerja bagi Projek Lebuhraya Pan Borneo Sabah akan dipertimbangkan untuk dilaksanakan dalam Rancangan Malaysia Keduabelas (RMKe-12) yang tertakluk kepada kemampuan kewangan Kerajaan.

Sekian, terima kasih.

**PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN SABRI BIN AZIT (JERAI)

TARIKH : 5 NOVEMBER 2019 (SELASA)

SOALAN

TUAN SABRI BIN AZIT (JERAI) minta **MENTERI KOMUNIKASI DAN MULTIMEDIA** menyatakan berapakah kos yang dibelanjakan dan apakah fungsi penubuhan 1430 buah Komuniti Harapan Malaysia diseluruh Negara.

JAWAPAN

Tuan Yang Dipertua,

1) Untuk makluman Ahli Yang Berhormat, Komuniti Harapan Malaysia (KHM) adalah sebuah badan sukarela pelbagai kaum yang diurus tadbir oleh Jabatan Penerangan Malaysia (JaPen) di peringkat komuniti setempat bagi memupuk nilai-nilai murni dan kenegaraan untuk merealisasikan aspirasi dan hala tuju negara. Ianya juga merupakan gerakan sukarela sebagai jaringan rangkaian strategik Kerajaan melalui JaPen di peringkat akar umbi sebagai penghubung komuniti dalam memasarkan maklumat Kerajaan dan perpaduan. Fungsi KHM secara umumnya adalah untuk:

- a) menerangkan maklumat Kerajaan dan isu-isu semasa dengan cepat, tepat dan sahih;
- b) memupuk semangat perpaduan dan cintakan negara dalam kalangan komuniti setempat;
- c) memantau dan mengumpul isu-isu dan kehendak komuniti setempat untuk perhatian dan tindakan penambahbaikan oleh agensi-agensi Kerajaan yang berkaitan; dan
- d) membantu memaju dan memperkasakan keupayaan dan daya saing komuniti setempat sejajar dengan perkembangan sosio-ekonomi semasa.

2) Kos pentadbiran KHM melibatkan peruntukan kewangan berjumlah RM5.7juta setahun bagi keseluruhan 1,430 KHM yang mana peruntukan ini adalah peruntukan sedia ada JaPen.

3) Setiap KHM akan menerima sejumlah RM4,000.00 setahun sebagai peruntukan pengurusan bagi membiayai pentadbiran Jawatankuasa KHM meliputi perbelanjaan pengurusan, utiliti dan kos-kos pentadbiran jawatankuasa.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' NGEH KOO HAM
[BERUAS]
TARIKH : 5 NOVEMBER 2019 (SELASA)

SOALAN NO. 33

Y.B. DATO' NGEH KOO HAM [BERUAS] minta **MENTERI KEWANGAN** menyatakan kadar cukai import ke atas kenderaan yang diimport daripada negara-negara ASEAN dan negara-negara bukan ASEAN. Adakah Kerajaan berhasrat untuk mengurangkan atau menghapuskan cukai import ke atas kenderaan yang diimport ke dalam Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, kenderaan yang diimport dari negara ASEAN adalah tertakluk kepada duti import 0%, manakala bagi kenderaan yang diimport dari negara bukan ASEAN adalah tertakluk kepada kadar duti import 30%. Pada masa ini, Kerajaan tidak berhasrat untuk mengurangkan atau menghapuskan duti import ke atas kenderaan yang diimport.

Namun begitu, sebarang langkah untuk mengurangkan kadar duti import bagi kenderaan import memerlukan kajian komprehensif dan menyeluruh supaya dapat memberi manfaat kepada golongan yang disasarkan serta mengambil kira kesannya kepada industri pengeluaran kenderaan tempatan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' MANSOR OTHMAN
[NIBONG TEBAL]**

TARIKH : 5 NOVEMBER 2019 (SELASA)

SOALAN NO. 34

Minta **MENTERI PEMBANGUNAN LUAR BANDAR** menyatakan memperincikan perancangan dan langkah-langkah yang telah diambil oleh Kementerian untuk memastikan penduduk-penduduk luar bandar tidak terpinggir dalam arus perdana pembangunan manakala Kerajaan berusaha menjadikan Malaysia sebagai sebuah negara maju dan berpendapatan tinggi.

JAWAPAN

Tuan Yang di-Pertua,

Untuk makluman Yang Berhormat, salah satu matlamat Dasar Pembangunan Luar Bandar 2030 (DPLB2030) yang dilancarkan pada 27 Jun 2019 yang lalu adalah untuk meningkatkan kesejahteraan penduduk luar bandar dari segi ekonomi, sosial, budaya dan persekitaran.

Dalam hal ini, Kementerian telah melaksanakan program khusus untuk membantu penduduk luar bandar termasuk golongan miskin dan miskin tegar seperti Program Perumahan Rakyat Termiskin (PPRT), Program Latihan Kemahiran dan Kerjaya (PLKK), Program Peningkatan Pendapatan (PPP) serta program keusahawanan yang dilaksanakan di bawah agensi KPLB seperti KEMAS, MARA dan Lembaga Kemajuan Wilayah bagi membantu meningkatkan pendapatan isi rumah penduduk di luar bandar.

Disamping itu, Kementerian komited meneruskan dan memperkasa strategi dan program-program pembangunan ekonomi sedia ada seperti Projek Bersepadu Pembangunan Ekonomi Kampung (PROSPEK), Program Desa Harapan dan Program Desa Lestari.

Selain itu, bagi mendukung hasrat Kerajaan untuk menjadikan Malaysia sebagai sebuah Negara maju dan berpendapatan tinggi, Kementerian akan meneruskan program-program berbentuk latihan dan kemahiran khususnya TVET melalui institusi pendidikan dan latihan melalui agensi di bawah Kementerian seperti MARA, KEMAS, KEDA dan PERDA. Pelaksanaan program ini dijangka akan memberi manfaat kepada lebih 52 ribu orang peserta.

Kementerian juga sedang memberi penumpuan dalam membangunkan 28 daerah dengan pendapatan purata bulanan isi rumah di bawah RM 4 ribu berdasarkan Laporan Penyiasatan Pendapatan Isi Rumah dan Kemudahan Asas Mengikut Negeri dan Daerah Pentadbiran 2016 yang dikeluarkan oleh Jabatan Perangkaan Malaysia. Usaha ini akan melibatkan pelaksanaan program/ projek KPLB yang berbentuk pembangunan fizikal, ekonomi dan modal insan yang boleh meningkatkan kesejahteraan penduduk di daerah berkenaan dan seterusnya mengeluarkan daerah tersebut daripada kemiskinan.

Justeru, dalam usaha Malaysia menuju ke arah Negara maju dan berpendapatan tinggi serta selaras dengan Dasar Pembangunan Luar Bandar agar nikmat pembangunan Negara harus dikongsi bersama, Kementerian sentiasa memastikan agar penduduk luar bandar turut dilibatkan sama dalam arus perdana pembangunan Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah status pembinaan rumah kos rendah Projek Perumahan Rakyat (PPR) Jalan Batu Arang, Wilayah Persekutuan Labuan dan berapa ramai permohonan untuk membeli/menyewa sudah diterima.

JAWAPAN

Tuan Yang di-Pertua,

1. Untuk makluman Yang Berhormat, projek Program Perumahan Rakyat (PPR) Jalan Batu Arang, Labuan kini telah mencapai kemajuan fizikal 35% dan dijangka akan dapat disiapkan mengikut jadual pada 28 Disember 2020.
2. Untuk makluman Yang Berhormat juga, permohonan untuk menyewa PPR ini boleh dibuat melalui laman sesawang Sistem Pengurusan Perumahan Negara (SPRN). Sehingga bulan September 2019, jumlah permohonan yang diterima daripada SPRN adalah seramai 24 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. PUAN MARIA CHIN BIN ABDULLAH
[PETALING JAYA]
TARIKH : 05 NOVEMBER 2019 (SELASA)

SOALAN NO. 36

Y.B. PUAN MARIA CHIN BIN ABDULLAH [PETALING JAYA] minta **MENTERI KEWANGAN** menyatakan status reformasi institusi yang ingin dibawa melalui pengenalan *Fiscal Responsibility Act* dan *Government Procurement Act* yang dicadangkan semasa Belanjawan 2019.

JAWAPAN

Tuan Yang di-Pertua,

Pengenalan Akta Tanggungjawab Fiskal atau *Fiscal Responsibility Act* (FRA) merupakan salah satu reformasi institusi bertujuan mengukuhkan lagi kewangan awam melalui peningkatan disiplin fiskal, keberkesanan perbelanjaan dan ketelusan. Inisiatif ini penting bagi memastikan kemampanan fiskal dalam jangka masa panjang.

Kementerian Kewangan sedang dalam proses menggubal akta tersebut dengan menubuhkan Jawatankuasa Pemandu dan Jawatankuasa Teknikal bagi memperinci konsep dan rangka kerja FRA. Selain itu, Kementerian Kewangan juga telah mengadakan perbincangan bersama pihak Tabung Kewangan Antarabangsa (IMF) bagi mendapatkan pandangan dan input berkaitan amalan terbaik di peringkat antarabangsa. Bantuan kepakaran daripada pihak-pihak yang berkaitan seperti Jabatan Akauntan Negara, Jabatan Audit Negara, Jabatan Peguam Negara dan IMF adalah penting bagi mendapatkan input-input seterusnya dapat merangka FRA yang komprehensif dan terbaik serta sesuai untuk dilaksanakan di Malaysia. Akta ini dijangka dibentangkan di Parlimen pada tahun 2021.

Kerajaan juga berhasrat mewujudkan satu rang undang-undang yang boleh mengawal selia proses perolehan kerajaan. Penggubalan Akta Perolehan Kerajaan (GPA) ini diharap dapat mencapai objektif berikut:

Pertama:	meningkatkan tadbir urus proses perolehan Kerajaan agar selaras dengan prinsip akauntabiliti awam, telus, nilai faedah terbaik, saingan terbuka serta adil dan saksama;
Kedua:	memupuk perolehan lestari melalui penetapan dasar dan peraturan yang menyokong pembangunan ekonomi, sosial serta pengurusan fiskal Kerajaan yang cekap;

Ketiga:	mewujudkan mekanisme semak dan imbang melalui penyediaan platform aduan terhadap pelanggaran peraturan perolehan Kerajaan oleh mana-mana pihak;
Keempat:	menguatkuasakan kawalan pematuhan ke atas pihak yang didapati menyalahgunakan kuasa, cuai atau tidak melaksanakan perolehan Kerajaan berdasarkan peraturan yang berkuat kuasa termasuk individu, syarikat, kontraktor dan firma yang memungkiri perjanjian.

Selaras dengan usaha merangka Rang Undang-undang (RUU) Perolehan, Kerajaan sedang mengadakan sesi libat urus bersama pelbagai pihak termasuk pihak berkepentingan dan agensi kerajaan bagi memastikan objektif utama penggubalan RUU Perolehan Kerajaan ini tercapai. Pada masa ini, Kementerian Kewangan sedang melaksanakan *Regulatory Impact Analysis* (RIA) termasuk sesi libat urus bagi memastikan semua input daripada pihak berkepentingan diambil kira dalam penggubalan RUU ini. Bagi memastikan libat urus yang komprehensif dan menyeluruh dapat dilaksanakan, RUU Perolehan Kerajaan ini akan dibentangkan di parlimen pada Julai 2020 dan akan berkuatkuasa mulai Januari 2021.

Justeru, pelaksanaan reformasi institusi melalui penggubalan FRA dan GPA ini akan mengukuhkan lagi kedudukan kewangan dan menyediakan ruang fiskal yang fleksibel serta meningkatkan akauntabiliti dan menerapkan amalan terbaik dalam pengurusan kewangan awam.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah kriteria penilaian kesan kesihatan (*Health Impact Assessment*) mesti dipatuhi sebelum meluluskan pembinaan menara telekomunikasi dan bekalan elektrik yang bervoltan tinggi bagi mengelakkan kesan berbahaya di kawasan-kawasan kediaman berdekatan.

JAWAPAN

Tuan Yang di-Pertua,

1. Untuk makluman Yang Berhormat, proses bagi mendapatkan kelulusan menara telekomunikasi melibatkan aspek-aspek teknikal iaitu *Traffic Impact Assessment* (TIA), *Environment Impact Assessment* (EIA) dan *Social Impact Assessment* (SIA). Kriteria penilaian kesan kesihatan (*Health Impact Assessment* - HIA) tidak termasuk dalam proses kelulusan tersebut.

2. Walau bagaimanapun, untuk makluman Yang Berhormat, berdasarkan input oleh Kementerian Tenaga, Sains, Teknologi, Alam Sekitar dan Perubahan Iklim (MESTECC), Tenaga Nasional Berhad (TNB) perlu mendapatkan kelulusan EIA daripada Jabatan Alam Sekitar (JAS) bagi pembinaan menara bekalan elektrik bervoltan tinggi di lokasi-lokasi yang sensitif terhadap alam sekitar. Seterusnya, pihak TNB juga perlu melaksanakan *Environmental Management Plan* (EMP) semasa proses pembinaan dilaksanakan.

3. Oleh itu, bagi mematuhi sebahagian daripada syarat-syarat EIA, pihak TNB perlu melaksanakan pengukuran terhadap kesan *Electro Magnetic Field* (EMF) yang berkaitan dengan HIA, berdasarkan garis panduan *World Health Organization* (WHO).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 5 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan langkah mengawal pembinaan hartanah mewah supaya tiada lagi lambakan dan apakah jaminan di peringkat Kementerian agar hartanah ini tidak dijual kepada warga asing demi menjaga kepentingan rakyat Malaysia.

JAWAPAN

Tuan Yang di-Pertua,

1. Untuk makluman Yang Berhormat, penentuan harga dan kuota bagi kediaman termasuklah perumahan mampu milik dan hartanah warga asing ditentukan oleh Kerajaan Negeri yang dikawal melalui syarat-syarat di bawah Kebenaran Merancang. Kerajaan Negeri akan mengenakan denda atau penalti mengikut syarat masing-masing sekiranya pemaju gagal melaksanakan perkara ini terutama dalam kuota penyediaan rumah mampu milik yang telah ditetapkan.

2. Kementerian Perumahan dan Kerajaan Tempatan (KPKT) juga akan bekerjasama dengan pihak Kerajaan Negeri bagi menyelaraskan maklumat lengkap berkaitan hartanah mewah yang tidak terjual di setiap negeri. Selain itu, Jabatan Perumahan Negara (JPN) juga sedang membangunkan sistem maklumat berintegrasi supaya dapat diakses secara atas talian (*online*).

3. Bagi menjaga kebajikan rakyat, KPKT lebih menumpukan usaha-usaha untuk merancakkan lagi pembangunan perumahan mampu milik dan pemilikan rumah oleh warga tempatan. KPKT melalui JPN telah menyediakan beberapa inisiatif seperti MyHome, FundMyHome, Transit Belia, dan Skim Sewa Beli bagi Program Perumahan Rakyat (PPR). Selain itu, KPKT juga telah menganjurkan *Home Ownership Campaign* (HOC) dari 1 hingga 3 Mac 2019 dan siri kedua HOC dari 4 hingga 6 Oktober 2019 bagi merancakkan lagi pemilikan rumah oleh warga Malaysia.

4. Berdasarkan data Pusat Maklumat Harta Tanah Negara, pada Suku Kedua 2019, terdapat 4,213 unit rumah mewah (12.8%) dengan nilai RM8.3 bilion tidak terjual yang berharga RM1 juta ke atas di negara ini. Sehubungan itu, penjualan rumah mewah kepada warga asing dapat mengurangkan lambakan unit rumah sedia ada serta menggalakkan pertumbuhan ekonomi secara keseluruhannya.

5. Selain itu, berdasarkan transaksi jual beli harta tanah kediaman yang dikeluarkan oleh NAPIC bagi tempoh Januari hingga Jun 2019, jumlah pemilikan rumah oleh warga asing adalah amat rendah iaitu 398 orang (0.4%), berbanding pemilikan oleh warga Malaysia iaitu 99,524 orang (99.6%). Secara keseluruhan, transaksi ini menunjukkan pasaran harta tanah kediaman bagi warga asing masih terkawal.

6. Untuk makluman juga, penetapan harga penjualan hartanah mewah kepada warga asing adalah berdasarkan garis panduan yang dikeluarkan oleh Unit Perancang Ekonomi (kini dikenali sebagai Kementerian Hal Ehwal Ekonomi - MEA) iaitu Garis Panduan Perolehan Hartanah merujuk kepada hartanah bernilai RM1 juta dan ke atas yang berkuat kuasa mulai 1 Mac 2014. Pada masa yang sama juga, Kerajaan Negeri turut mempunyai dasar pemilikan hartanah warga asing bagi memastikan pihak pemaju tidak sewenang-wenangnya membina rumah mewah yang bertujuan untuk dijual kepada warga asing dan warga asing tidak sewenang-wenangnya boleh membeli rumah tanpa kawalan sehingga menimbulkan spekulasi pasaran harga rumah.

7. Mengenai pengumuman Belanjawan 2020 yang telah menurunkan had milikan warga asing daripada RM1 juta kepada RM600,000, KPKT akan bekerjasama dengan Kementerian Kewangan, kementerian-kementerian serta agensi lain yang terlibat seperti Jabatan Ketua Pengarah Tanah dan Galian (JKPTG) di bawah Kementerian Air, Tanah dan Sumber Asli (KATS), Kementerian Dalam Negeri (KDN), Lembaga Hasil Dalam Negeri (LHDN) dan Kerajaan Negeri agar satu mekanisme kawalan dapat diwujudkan bagi mengelakkan spekulasi harga oleh pemaju dan menjaga kepentingan pembeli tempatan.

Sekian, terima kasih.